



2025-1

4. septembari 2025

All. nr./notatnr.:

2022-145-0003-23

Sull./sagsbeh.: MS/HH

**Kommune Qeqertalimmit angajoqqaap meeqqami
angerlartinneqarnissaat pillugu noqqaassutaanut piffissaq
suliap suliarineqarneranut atorneqartoq ombudsmandimit
ajorluinnartutut illersorneqarsinnaanngitsutullu isigineqar-
poq**

*2012-imi meeqqat marluk (matuma kingorna B1 aamma B2)
angajoqqaavaniik (matuma kingorna A) kommunimit angerlarsimaffiup
avataanut inissinneqarput.*

*A 27. november 2012-imi oqaasiinnakkut B1'ip aamma B2'p
angerlartinneqarnissaanik noqqaassuteqarpoq. Tamatuma kingorna B1'ip
aamma B2'p angerlartinneqarnissaanik A noqqaassuteqartuartarpoq.*

*A 24. september 2022-mi meeqqami angerlartinneqarnissaanik
noqqaassutimi suliarineqarnerani, kommunip piffissaq suliap suliarineqar-
neranut atugaa pillugu A ombudsmandimut naammagittaalliuteqarpoq.*

*Ukiut qulit sinnerlugit B1'ip aamma B2'p inissinneqarsimareersut
kommune suli aalajangiissuteqanngitsoq inersimasutut nammineersin-
naalerput.*

*Kommunip ukiut qulit sinnerlugit piffissaq suliap suliarineqarneranut atugaa
ombudsmandimit ajorluinnartutut illersorneqarsinnaanngitsutullu
isumaqarfigineqarpoq.*

A angerlartitsinissamik allakkatigut noqqaassuteqarnissamik arlaleriarluni kommunimit noqqaavigineqartarpoq. Angerlartitsiniarnermi angajoqqaatut oqartussaasumit allakkatigut noqqaassuteqarnissamik piumasaqaateqarnissamut inatsisitigut tunngavissaqarneranik ombudsmandi isumaqanngilaq.

Kommunip allaganngorlugu piumasaqarnera ombudsmandimit isorisarialittut isumaqarfigineqarpoq.

Kommunimit A ilisimatinneqarpoq, sulisunik napparsimasoqarnera pissutigalugu angerlartitsinissamik noqqaassutaa suliatut matuneqartoq. Kommune pisariaqartunik sulisussaqaannginnerani suliamik uninngatitsiinnarneq inatsisitigut tunngavissaqaanngitsoq ombudsmandi isumaqarpoq.

Kommunip suliamik matusisimanera ombudsmandimit isorisarialerujussuartut isigineqarpoq.

Ombudsmandip paasinninnera unaavoq, A'p angerlartitsinissamik noqqaassutimi killiffia pillugu ingerlaavartumik nalunaarfigineqartarsimanngitsoq.

Kommunip ukiorpassuarni A-mut nalunaaruteqartarsimannginnera ombudsmandimit isorisarialerujussuartut isigineqarpoq.

Ombudsmandip inassutigaa, kommunip qulakkiissagaa, sullissisut ilisimassagaat angerlartitsiniarneq pillugu allakkatigut noqqaassuteqarnissamik piumasaqaateqarneq inatsisitigut tunngavissaqaanngitsoq.

Taamatuttaaq ombudsmandimit inassutigineqarpoq, naak sulisussanik amigaateqartoqaraluartoq innuttaasunut aalajangiissuteqartoqarnissaa kommunimit qulakkeerineqartassasoq

Ombudsmandip Inatsisartut Inatsisinut Ataatsimiititaliaat aamma Kommune Qeqertalimmi kommunalbestyrelsi, Ombudsmandi pillugu inatsimmi § 23, tunngavigalugu nalunaarfigaa, pisortat ingerlatsivianni annertunerusumik kukkussuteqartoqarsimanissaa imaluunniit sumiginnaasoqarsimanissaa ilimagisariaqarmat. Ombudsmandip suliamik misissuinerata tamanna takutippagu, Ombudsmandi suliaq pillugu Inatsisartut Inatsisinut Ataatsimiititaliaannut tamatumunngalu peqatigitillugu Naalakkersuisunut imaluunniit kommunalbestyrelsimut nalunaaruteqartussaammat.

(4. september 2025, j.nr. 2022-145-0003)

Ombudsmandip oqaasetaa:

1. Suna misissorsimavara?

1.1 Suliamik suliaqarninni A-p angerlartitsiniarneq pillugu allakkatigut noqqaassuteqarnissaanik kommunip piumaffiginninnerata isummerfiginissaa aalajangiuppara.

Taamatuttaaq A-p, B1-mik B2-millu angerlartitsinissamik noqqaassutaanut kommunip piffissaq suliap suliarineqarneranut atugaa isummerfigaara.

B3-mik angerlartitsinissaq pillugu A-p noqqaassutaanut kommunip piffissaq suliap suliarineqarneranut atugaa oqaaseqaammi matumani isummerfiginngilara, tassa paasinninnera unaammat, siusinnerusukkut B3 kommunimit angerlartinneqareersimasoq.

Taamatuttaaq A-p angerlartitsinissamik noqqaassutaata suliarineerullugu uninngatiinnarneqarsimanera pillugu kommunip ilisimatitsinera isummerfigaara.

Naggataatigullu kommunip suliap suliarineqarnerata killiffia pillugu A-mut nalunaaruteqartarsimannginnera isummerfigaara.

Oqaatigissavara, oqaaseqaatinni uani kommunip suliap suliarineqarnerani inatsisitigut tunngavissat qaqugukkulluunniit atuuttut naapertorlugit inissiinerit allakkatigut aalajangiivigineqarsimanersut, isumaginninnermi misissuinermik

eqqortumik ingerlatsisoqarsimanersoq imaluunniit inatsit atuuttoq malillugu iliuusissatut pilersaarutit suliarineqarsimanersut nutarterneqarsimanersullu isummerfiginnginnakkit.

Tamatumani Inatsisartut Ombudsmandiat pillugu Inatsisartut inatsisaanni nr. 7-imi, 1. juni 2017-imeersumi § 14, imm. 1 (matuma kingorna Ombudsmandi pillugu inatsit) innersuussutigaa, tassani aalajangersarneqarpoq naammagit-taalliuut misissuineramik aallartitsinissamut pissutigissallugu naammannersoq ombudsmandip nammineq aalajangissagaa.

1.2. Ajornartorsiutinik taamaattunik siusinnerusukkut nammineq suliarinnissi-manngikkaangama Qallunaat Nunaanni atuakkiaasimasut aamma Folketingip Ombudsmandiata periaasia oqaaseqaatinni arlalitsigut aallaavigisarpara. Kalaallit Nunaanni inatsiseqartitsinikkut tunngaviup Qallunaallu Nunaanni inatsiseqartitsinikkut tunngaviup pingaarnerusutigut assigiinnerat tamatumun-ga pissutaavoq. Kalaallit Nunaanni inatsiseqartitsinikkut tunngavik Qallunaat Nunaanni inatsiseqartitsinikkut tunngavimmit allaasoq isumaqaraangama tamanna malugeqqusarpara.

Oqaaseqaatiga imatut tulleriinnilerneqarpoq:

- Immikkoortoq 2: Suliaq pillugu naatsumik oqaatigisassat
- Immikkoortoq 3: Inatsiseqartitsinikkut tunngavigisaq
- Immikkoortoq 4: Kommunip isumaa
- Immikkoortoq 5: Uanga naliliinera

Malugeqquara suliap ingerlasimanerata allaaserineqarnera oqaaseqaammut uiggiussaammat.

2. Suliaq pillugu naatsumik oqaatigisassat

A-p meerai B1 aamma B2 2012-imi angerlarsimaffiup avataanut inissinneqarput.

A 27. november 2012-imi kommunimut saaffiginippoq, tassani meeqqami marluk angerlartinneqarnissaannik oqariartuuteqarluni. A allakkatigut

angerlartitsinissamik qinnuteqarnissaanik sullissisumit noqqaavigineqarpoq, kingorna isumaginninnermut ataatsimiititaliamit aalajangiivigineqassammat.

21. december 2012-imi A kommunimik ataatsimeeqateqarpoq, tassani angerlartitsinissaq pillugu killiffik pillugu A nukingisaaruteqarluni.

4. juli 2013-imi A kommunimi ataatsimeeqateqarpoq, tassanilu iliuusissatut pilersaarut atsiorlugu. Ataatsimiinnermi tassani kommunimit A-mut oqaatigineqarpoq, iliuusissatut pilersaarut atsioreeriarpat, meeqqat angerlartinneqarnissaannut suliaq aallartinneqarumaartoq.

Allakkatigut 8. oktober 2013-imeersutigut kommunimit A-mut oqaatigineqarpoq, angerlartitsinissamik suliaq suliarineqaleruttortoq, tassa meeqqat pillugit oqaaseqaatinik piniarnissamut kommune suliamik aallartitsisimasoq. Kommunimit A-mut aamma oqaatigineqarpoq, suliaq akimortumik suleqatigiissitanut saqqummiunneqarumaartoq, tamatumalu kingorna Ilaqutareeqarnermut Ataatsimiititaliamut aalajangiiffigisassanngorlugu ingerlateqqinneqassasoq.

13. december 2013-imi A meeqqat qaqugu angerlartinneqarnissaat paasinialugu kommunimut saaffiginnippoq. A-p kommunimut oqaatigaa, paasitinneqarsimalluni meeqqat angerlartinneqangajalersut, aliasuutigalugulu tamanna oqaasiinnakkut nalunaarutigineqarmat. A sullissisumit oqarfigineqarsimavoq, akimortumik suleqatigiissitanit angerlartitsinissamik noqqaassutip itigartitsissutigineqarnissaa inassutigineqarsimasoq.

15. juni 2015-imi A kommunimut saaffiginnippoq, tassani B3-p, B-1p aamma B2-p angerlartinneqarnissaannik kissaateqaqqilluni. Oqaloqatigiinneq aallaavigalugu nalunaarsuiffimmi allagaatinit erserpoq, A-p angerlartitsinissamik noqqaassutaa tunngavigalugu iliuusissatut pilersaarut suliarineqarnikuusoq.

B3-mik, B1-mik aamma B2-mik angerlartitsinissaq siunertaralugu A 11. september 2015-imi Ilaqutariit Illuanni oqaloqatigineqarnissamut innersuunneqarpoq.

28. februar 2017-imi A angerlartitsinissamik noqqaassutimi killiffia paasiniallugu kommunimut saaffiginnippoq, tassani suleqataarusunnini oqaatigalugu. Suliap ingerlanneqarneranut tunngatillugu A-p oqaatigaa, paasisinnaanagu suliami qanoq ingerlasoqartoq, suliap ingerlanneqarnera pillugu paasitinneqarneq ajorami.

28. november 2019-imi A kommunimut saaffiginnippoq, tassani kommunimit ilisimatinneqarneq ajornini naammaginagu oqariartuuteqarluni. Tassunga tunngatillugu A-p oqaatigaa, misigisimalluni meeqqaminik arsaavinneqarsimalluni. A angerlartitsinissamik kissaateqaqqippoq.

21. december 2020-mi A kommunimut saaffiginnippoq, tassani A meeqqani angerlartinneqassanersut angerlarsimaffiulluunniit avataani inisseqqaannas-sanersut ilisimatinneqarnissaminik kissaateqarpoq. A-p aamma oqaatigaa, kommunimit suliap suliarineqarneranik ilisimatinneqarneq ajorluni.

2. februar 2021-mi kommune A-mik ataatsimeeqateqarpoq, tassani A-p meeraasa angerlartinneqarnissaat pillugu noqqaassutigisai eqqartorneqarlutik. Ataatsimiinnermi A-p oqaatigaa, suliap suliarineqarnera pillugu ilisimatinneqanngisaannarluni aammalu nalunaarfigineqassanani, taamaattumillu paasiuminaatsillugu, ilumut meeqqat tigoqqissinnaassanerlugit. A-p oqaatigaa, misigisimalluni meeqqani annaavissimallugit tigoqqissinnaanagillu, aammalu susoqarneranik oqarfigineqarnani meeqqat imminermiik peersitaasut. Suna pillugu meeqqat inissinneqarsimanerat A-mut sullissisumit oqaatigineqarpoq, iliuusissatut pilersaarutip imarisaa nassuiaassutigineqarluni aammalu tikeraarsinnaatitaaneq pillugu nassuiaanneqarluni. A-p oqaatigaa, meeqqami angerlartinneqarsinnaanissaat neriutigisinnaallugu.

7. maj 2021-mi kommune meeqqat angerlarsimaffiup avataanut inissinneqarne-rat pillugu A-mik ataatsimeeqateqarpoq. Ataatsimiinnermi tassani aamma A-mit oqaatigineqarpoq, angerlartitsinissamik noqqaassutini kommunimit akineqanngisaannartoq. A meeqqami angerlartinneqarnissaannik noqqaassute-

qaqqippoq. A kommunimit ilitsersorneqarpoq, angerlartitsiniarnini pillugu allakkatigut noqqaassuteqassasoq.

A-mut iliuusissatut pilersaarummi 14. maj 2021-meersumi oqaatigineqarpoq, meeqqat 2014-imi angerlarsimaffiup avataanut inissinneqarsimasut. Meeqqat angerlartinneqarnissaat A-mit kissaatigineqartoq, kiisalu A ukiumi nutaami meeqqami angerlartinneqarnissaanik qinnuteqarniartoq. Iliuusissamik pilersaarummittaaq oqaatigineqarpoq, A isumaqartoq, meeqqat angerlarsimaffiup avataanut inissinneqaqqanerat sivitsorpallaartoq, A-lu isumaqartoq, meeqqat inersimalerpallaartinnagit angerlartinneqarnissaannut piareersimasutut misigisimalluni.

26. maj 2021-mi kommune A-mik ataatsimeeqateqarpoq, tassani A-p meeqqat angerlartinnissaanut pilersaarutiminik eqqartuivoq.

Sulisuma ilaanik oqarasuaatikkut 1. november 2022-mi oqaloqateqarnermi kommunimit oqaasinnakkut oqaatigineqarpoq, A 9. juni 2021-mi meeqqat angerlartinneqarnissaat pillugu noqqaassuteqaqqissimasoq.

Kommunip 9. marts 2023-mi oqaaseqaatimini uannut oqaatigivaa, 14. juni 2021-mi A meeqqat angerlartinneqarnissaanik noqqaassuteqarsimasoq.

A 24. juni 2021-mi B1-p aamma B2-p angerlartinneqarnissaannik noqqaassuteqarluni kommunimut saaffiginnippoq.

30. juni 2021-mi kommune B2-mut iliuusissatut pilersaarusrpoq, 5. juli 2021-milu B1-mut iliuusissatut pilersaarusrloq.

Tamatuma kingorna kommune suliamik INUIT ataatsimiititaliamut saqqummiussamik suliaqarpoq, 6. oktober 2021-mi ingerlatsivimmut suliaq nutaamik suliarisassanngorlugu utertinneqartumik.

B1 2. januar 2022-mi 18-inik ukioqalerpoq.

Kommune 20. maj 2022-mi meeqqanik angerlartitsinissaq pillugu A-mik ataatsimeeqateqarpoq. Ataatsimiinnermi tassani A-mit oqaatigineqarpoq, angerlartitsinissaq utaqqikatalugu. A-mit ilaatigut oqaatigineqarluni, misigisimalluni, meeqqat angerlatinneqarnissaat neriulluarfigissaguniuk, kommunimit pinngitsaalisalluni atornerluisutut katsorsartinnissamut peqataaq-quneqarsimalluni.

A 1. juni 2022-mi kommunimut saaffiginnippoq, angerlartitsinissamut noqqaassutimi killiffia paasissutissiissutigeqqullugu, oqaatigalugu naammaginagu ukiut tamaasa iliuusissatut pilersaarutit nutarsarneqartarnerat kommunili angerlartitsinissaq pillugu aalajangiissuteqarsimanngitsoq.

Kommune allakkatigut 24. april 2024-meersutigut A-mut nalunaaruteqarpoq, kommune 2013-imi angerlartitsinissap itigartitsissutigineqarnera pillugu oqaasiinnakkut aalajangiisimasoq. A ilitersorneqarpoq, iliuusissatut pilersaarummi anguniagassat anguneqarpata meeqqat angerlartinneqarnissaannik qinnuteqaqqissinnaasoq. Naggataatigullu kommunimit oqaatigineqarluni, kommunimi sulisut napparsimallutik sulisimanngitsut, taamaalillunilu A-p angerlartitsinissamik noqqaassutai uninngatiinnarneqarsimasut.

A 23. maj 2024-mi toqukkut qimaguppoq.

B2 17. december 2024-mi 18-inik ukioqalerpoq.

3. Inatsiseqartitsinikkut toqqammavik

3.1. 2017 sioqqullugu inatsisitigut tunngavissat

Piffissami A-p meeraasa inissinneqarneranni, Meeqqanik Inuusuttunillu ikiorsiisarneq pillugu Inatsisartut peqqussutaat nr. 1, 15. april 2003-meersoq kingusinnerusukkut allannguuteqartoq (meeqqat pillugit peqqussut) atuuppoq.

Meeqqat pillugit peqqussutip § 10-ani imm. 1-imi ersersinneqarpoq, angajoqqaatut oqartussaassuseqartup aammalu meeqqap akuersissutaa pigineqarpat pigineqanngikkaluarpalluunniit – meeqqap angerlarsimaffiup avataanut inissinneqarnissaa kommunalbestyrelsip aalajangiussinnaavaa – meeqqap peqqis-

susaata imaluunniit ineriartornerata ilungersunartumik ajoquserneqarsinnaanera qularnanngitsumik ulorianartorsiorpat.

Ilaatigut aamma meeqqat pillugit peqqussutip § 27-ani imm. 1-imi ersersinneqarpoq, § 10 naapertorlugu suliniutit unissapput, suliniuteqarnermi siunertaq anguneqarpat, ilanngullugit iliuuseqarnissamik pilersaarummi anguniakkat anguneqarpata, imaluunniit suliniuteqarneq siunertaminik naammassinnikkunnaarpat.

Angerlarsimaffiup avataanut inissiineq unissanngitsoq kommunalbestyrelsi aalajangiisinnaavoq, tamanna meeqqap angerlartinneqarneratigut pisariaqartitaanut akerliuppat. Tamanna aamma atuuppoq angajoqqaatut oqartussaassuseqartoq akuersiseqqaarlugu akuersiseqqaarnaguluunniit meeraq angerlarsimaffiup avataanut inissinneqarsimappat. Tamanna meeqqat pillugit peqqussummi § 29-mi nassuiarneqarpoq.

Nassuiaammut tassunga, taamanikkut Ilaqutareeqarnermut pisortaqarfiup meeqqat inuusuttuaqqallu ikiorserneqartarnerat pillugu ilitersuutaani imm. 14.6 innersuussutigaa.

3.2. 2017-ip kingorna inatsisitigut tunngavissat

Meeqqanik tapersersuisarneq pillugu Inatsisartut inatsisaat nr. 20, 26. juni 2017-imeersoq kingusinnerusuklut allannguuteqartoq (matuma kingorna meeqqat tapersersorneqartarnerat pillugu inatsit) 1. juni 2017-imi atuutilerpoq.

Meeqqanik tapersersuisarneq pillugu inatsimmi § 28, imm. 1-ip malitsigivaa, kommunalbestyrelsip, angajoqqaatut oqartussaassusilik meerarlunniit akuersiteqqaarnagit meeqqap angerlarsimaffiup avataanut inissinneqarnissaa aalajangissavaa, meeqqap peroriartorneranut, peqqissusianut ineriartorneranulluunniit ilungersunartumik ajoquserneqarnissaa aarlerinarluinnarpat.

Meeqqanik tapersersuisarneq pillugu inatsisip § 40-ani imm. 1-imi ersersinneqarpoq, ikiorsiinissamik suliniuteqarnerit, ikiorsiinissamillu suliniuteqarnerit immikkut ittut kiisalu ikiorsiinissamik suliniuteqarnerit sukannernerit, kiisalu

tamakku pillugit suliniuteqareernermi malitseqartitsilluni suliniutit unitsinneqasasut, taakku malillugit sulinermi anguniarneqartut anguneqarpata, imaluunniit ikiorsiinermik suliniuteqarnikkut siunertarineqartut tunngavissaarukkaangata.

Inatsisitigut tassuuna pissutsit assigiinngitsut aalajangersarneqarput, angerlarsimaffiup avataanut inissiinerup unitsinneqarnissaanik kommune aalajangiitinagu kommunimit misissorneqartussat. Assersuutigalugu meeraq oqaloqatigineqassaaq iliuusissatullu pilersaarut suliarineqarluni. Tamanna meeqqanut taper-sersuisarneq pillugu inatsisip § 41-ani imm, 1, nr. 1-iata aamma nr. 4-raata malitsigivaa.

Misissuineq taanna kommunimit ingerlanneqartussaq, meeqqanut taper-sersuisarneq pillugu inatsisip oqaaseqaataani itisilernerqarpoq. § 41-mi imm, 1, nr. 1-imi ilaatigut ima oqaaseqaateqarpoq:

”Kommunalbestyrelsen meeqqap angerlarsimaffiup avataanut inissinneqartariaqarneranut taamanikkut atukkat tunngavilersuutigineqartut ilaqutariinni aaqinnegarsimanersut misissuinermi aallaavigisariaqarpaa. Sioqqutsumik misissuinerup tamatuma ilaatut angajoqqaatut oqartussaassusilinni pissutsit maannakkullu angajoqqaatut piginnaassusaat isummerfigineqartariaqarput. Angajoqqaat assersuutigalugu imigassamik atornerluisuusimappata, angajoqqaat maannakkut atornerluiner-miit aniguisimanersut misissuiffigineqassaaq. Angajoqqaatut oqartussaassusilinni pissutsinik il.il. misissuinermi, angajoqqaat maannakkut isumassuisinnaassusiat, isumannaatsuunerat, misigissutsitigut kialaassusiat, meeqqanik inerikkiartortitsi-sinnaassusiat, iltersuisinnaassusiat, killiliisinnaassusiat, allanngujaassusiat il.il. aamma ilanngunneqartariaqarput. Angajoqqaatut oqartussaassusillit allanik meera-qarsinnaaner at pillugu paasissutissat meeqqallu taakku alliartornerat angajoqqaaminnullu attaveqarnerat, angajoqqaatut oqartussaassusilinni pissutsit il.il. nalilersor-nerannut ilaasussatut naatsorsuutigisariaqarpoq.”

Aalajangersagaq imatut isigineqassaaq, ingerlatsineq pillugu inatsiseqartitsi-nermi nalinginnaasumik periuseq atuummat, pisortat oqartussaataaasa paasissutissanik piniarnissaq isumagissammasuk, suliap eqqortumik aalajangif-figineqarnissaanut pisariaqartumik.

Periaaseq taanna oqartussaasup paasissutissanik pisariaqartunik peqartussaa-nerannik tunngavimmik taaneqartarpoq imaluunniit oqartussaasup qulaarsisussaataitaneramik taaneqartarluni. Periutsip taassuma kingunerivaa, misissuinermi paasissutissat pisariaqartut sukkanerpaamik naleqqunnerpaamillu

pissarsiarineqarnissaat – tassa aalajangiinerup eqqortumik aalajangiiffiginis-
saanut suliaasap oqartussaasumit pisariaqarnera tamakkerlugu paasiniarneqas-
saaq. Imaappoq, suliamut paasissutissat, paasissutissat suliaap aalajangiiffiginis-
saanut pisariaqanngitsumik kinguarsaataasanngillat.

Oqartussaasunut ilitsersuutinni imm. 5 innersuussivunga, taanna nittartakkanni
www. ombudsmand. gl-imi takuneqarsinnaavoq.

Taamatuttaaq periuseq taanna pillugu Namminersornerullutik Oqartussat
suliaasat suliarineqartarnerat pillugu inatsit pillugu ilitsersuut 1994-imeersumi
(matuma kingorna suliaasat suliarineqartarnerat pillugu inatsit) imm. 198-imi
allaaserineqartoq innersuuppara.

Isumaga malillugu tassani pingaarnertigut Kalaallit Nunaanni inatsiseqartit-
sinikkut tunngavik aamma Danmarkimi inatsiseqartitsinikkut tunngavik assigiit-
put. Taamaammat Oqartussaasut paasissutissanik pisariaqartunik tunngavis-
saqarnissaat pillugu Niels Fengerip atuakkiaani Forvaltningsret (2018), qup. 484
tullittunilu nassuiarneqartoq innersuussutigaara.

Suliaap misissoreernerani kommune aalajangiisinnaavoq, meeraq angerlartinne-
qassanersoq imaluunniit angerlarsimaffiup avataani inissisimaannassanersoq
– ilaatigut allamik tunngavissalerneqarluni.

Meeraq angajoqqaatut oqartussaassulimmik akuersisitsilluni inissinneqarsimap-
pat, kommunillu nalilerpagu meeraq angerlartinneqarsinnaanngitsoq, tassunga
piumasaqaatit tamarmik malinneqarsimappata taava akuersissutitaqanngitsumik
inissiiinertut ingerlaannassasoq, inissiinerup attatiinnarnissaanut aamma
kommune aalajangiisinnaavoq.

Meeraq angajoqqaatut oqartussaasusilimmit akuersititseqqaarani inissinneqarsi-
mappat, soorunalimi aamma kommune aalajangiisinnaavoq, inissiinerup taas-
suma allanngortinnissaanut tunngavissaqanngitsoq.

3.3. Angerlartitsiniarnerup allakkatigut pinissaanik piumasagarneq

Meeqqamut angerlarsimaffiup avataanut inissinneqarsimasumut angajoqqaatut oqartussaassuseqartoq, meeqqamik angerlarsimaffiup avataanut inissinneqarsimasumik angerlartitsiniarluni kommunimut nalunaaruteqarpat, tassani kommunip isummerfigissavaa noqqaassutigineqartoq akuersaarneqarsinnaanersoq.

Pisortani oqartussaasumit suliat sapinngisamik pisariitsumik suliarineqassapput. Ilaatigut imaappoq, suliamik suliarinninneq pisariaqanngitsunik nammineq isummanik atuiniarnikkut imaluunniit allagaqartussaataitaaanermik kinguarsarneqartariaqanngilaq.

Meeqqat pillugit peqqussummi imaluunniit meeqqat tapersersorneqarnissaat pillugu inatsimmi piumasagaataanngilaq, angerlartitsinissamik angajoqqaatut oqartussaassusilik allakkatigut noqqaassuteqassasoq. Kommune angerlartitsinissamik noqqaassummik oqaasiinnakkut tigusaqarpat – assersuutigalugu angajoqqaamik oqaloqateqarnermi – tassani kommune pisussaavoq suliaasaq suliarissallugu. Suliassap tamassuma inatsimmik naapertuuttumik tunngaveqartussaananeramik aallaaviup malitsigivaa.

Inatsimmik naapertuuttumik tunngaveqartussaananermik aallaavik pillugu paasisaqarnerorusukkaanni, 2023-2-mi aamma 2021-4-mi oqaaseqaatigisakka, nittartakkanni atuarneqarsinnaasut innersuussutigaaq.

Taamatuttaaq Niels Fengerip atuakkiaani, "Forvaltningsret"-imi saqqummersitaq 1, (2018-imeersumi), qupperneq. 311, aamma Karsten Revsbechip allallu, "Forvaltningsret" – Alimindelige emner", arfinilissaa naqitaq, (2016-imeersoq), qup. 203 innersuussutigaaq.

3.4. Piffissaq suliap suliarinneqarneranut atorineqartoq

Angajoqqaat meeqqamik, angerlarsimaffiup avataanut inissinneqarsimasumik angerlartitsinissamik noqqaassuteqarneranni, meeqqat pillugit peqqussummi kommunip qanoq sukkatigisumik aalajangiinissaanut immikkut piffissaliussaartoqarsimanngilaq.

Aamma taamatut atuuppoq meeqqat tapersersorneqartarnerat pillugu inatsimmi massakkut atuuttumi.

Taamatuttaaq pisortani oqartussaasut piffissaq suliap sularineqarneranut atorneqartoq pillugu, suliat sularineqartarnerat pillugu inatsimmi imaluunniit inatsisini allani nalinginnaasunik aalajangersagaqanngilaq.

Nalinginnaasumilli najoqqutarineqarpoq ingerlatsinermi pissuserissaarnissap malitsigaa, suliassat sapinngisamik sukkanerpaamik akisussaassuseqartumillu sularineqartarnissaat.

Ilaatigut innersuussutigaa akka siusinnerusukkut suliani, pisortat ingerlatsiviini piffissaq suliap sularineqarneranut atorneqartoq pillugu piumasaqaatit nassuiar-neqarneri, suliat sularineqartarnerat pillugu inatsisip ilitsersuutaani ersersinne-qartut. Ilitsersuummi ilaatigut ersersinneqarput:

”199. Suliassat tamarmik pisortat ingerlatsiviini sularineqartut soorunami sapinngisamik pisa-riitsumik, pilertortumik aningaasartuutaavallaanngitsumillu sularineqartarnissaannik piumasa-qaat pingaartumik atuuppoq suliassanut inuit ataasiakkaat imaluunniit namminersorlutik ingerlatseqatigiiffiit, suliffeqarfiit, peqatigiiffiit il.il. attuumassuteqarfigisaanni.

[...]

204. Suliassat sularineqartarnerat pillugu inatsit suliassat qanoq sivilutigisumik sularine-qartarnissaat pillugu nalinginnaasunik aalajangersagartaqanngilaq. Tamatumunnga ilaatigut pissutaavoq suliassat pisortat ingerlatsiviini sularineqartartut assigiinneqimmata assigiinne-qisunillu annertussuseqartarlutik, taamaattumik inatsisikkut pisortat ingerlatsiviini qanoq siviluti-gisumik sularineqartarnissaasa aalajangersimasumik malittarisassioarnissaat ajornarlunnartus-saalluni, tassa eqqartuussivinni ajornarpallaanngitsumik atortinniarneqarsinnaasunik.

Kisiannili folketingip ombudsmandiata oqaaseqaatigisartagai tunngavigalugit nalinginnaasu-mik ingerlatsinermi ileqqorissaarnerup malinniarneqarnissaani suliassat qanoq sivilutigisumik sulariniarneqartarnissaat pillugu malittarisassaqaartitsisoqarpoq, matuma ataani suliamut tun-ngassuteqartup suliap qanoq sivilutigisumik sularineqassangatinneqarneranik ilisimatinne-qartarnissaa ilanngullugu.

Ombudsmandip aammattaaq aalajangikkat ilaanni tikkuavigisarsimavaa suliat siviluumik aala-jangiivigineqaratik uninngatinneqartarnissaat pinaveersaarniarlugu kiisalu puigortoorneqarlutik aalajangiivigineqanngitsoortarnissaat pinaveersaarniarlugu oqartussaasut naammattumik ator-sinnaalluurtunik suliat uterfigeqqinneqartarnissaannut allattuiffiliortarnissaat.”

Taamaammat piffissaq suliap suliarineqarneranut atorneqartoq tamanut atuuttumik akineqarsinnaanngilaq, suliamili pineqartumi immikkut nalilersuisoqartariaqarluni.

Siusinnerusukkut nalunaarusianni oqaatiginikuuara, uanga naliliinera unaasoq, angajoqqaatut oqartussaasumut meeqqat angerlarsimaffiup avataanut inissineqarsimasunik angerlartitsiniarnermi, sapaatit akunneri imaluunniit sivilisunerpaaamik qaammatialuit iluanni noqqaassutigineqartumut kommune aalajangiisariqartoq. Oqaaseqaatiginikuusara 2019-2-meersoq innersuussutigaa.

Oqartussaasup suliap pisariaqarneratut pilertortigisumik suliarinninneranut naliliinerani, piffissaq suliap suliarineqarneranut ataatsimut atorneqartup sanitigut pissutsit allat ilanngullugit aamma isiginiarneqartariaqartut, taakkununga suliap suussusia, ajornakusuussusia, oqartussaasut misissuisariaqarnerisa annertussusiat piffissarlu oqartussaasup suliani taamaattuni suliarinninnerminut atortagaa ilanngullugit. Pineqartoq aamma tassaasinnaavoq suliami illua'tungiusup pilertortumik aalajangiisoqarnissaanik pisariaqartitsineranik soqutigisaanillu isiginninneq ilanngullugit.

Aallaavittut oqartussaasut sulisullu pineqartumut piffissaq suliap suliarineqarneranut atugaat, suliap suliarineqaranut atugaannut nammineq isumaat naliliinermi eqqarsaatigineqarneq ajorpoq. Naliliinerli kinaassusersiortuunngitsumik tunngaveqartariaqarpoq, suliap suunera, suliamilu pissutsit piviusut pingaartinneqartussaallutik. Atorfiup inuttaqanngikkallarnera, assersuutigalugu napparsimasoqarneratigut, feeriartoqarnera, pikkorissartoqarnera aamma allaffissornikkut aningaasaqarnikkullu atugassarititaasunik amigateqarneq, piffissaq suliap suliarineqarneranut nalinginnaasumik sivitsorsaa-taasussaasariaqanngikkaluarput.

Imatut pisoqartillugu, suliaq pisarialimmik suliarineqarsinnaanani, sulisup akisussaasup sulinngikkallarnerani, nalinginnaasumik suliap allanit suliarineqarnissaa oqartussaasup isumagissavaa.

Oqartussaasup aalajangiiniarnermi piffissaq suliamik suliarinninnermut naammaginartumik sivisussusilik, innuttaasup oqartussaasunut inatsiseqartitsinikkut isumannaatsuutitsineranik tatiginnilersitsisarpoq. Oqartussaasup innuttaasumut inaarutaasumik aalajangiiviginninnissaa pingaaruteqarpoq, taamaalilluni innuttaasup qanoq inissisimanini ilisimassammagu, aammalu innuttaasup aalajangiineq pillugu naammagittaalliuteqarusunnerluni isummersuutigisinnaassammagu.

Suliani arlalinni pisortat oqartussaafigisaannit piffissaq suliap suliarineqarneranut atorneqartoq pillugu oqaaseqaateqartarpunga. Ilaatigut innersuussutigaa ukiumut nalunaarusianni 2011-mi imm. 5.7.1, kiisalu nalunaarusianni 2005-imi qup. 56 (qallunaatuuani naqitaq) aamma qup. 69 (kalaallisuuani naqitaq). Kingullertut eqqaaneqartoq suliaq ombudsmandeqarfimmit periuusitoqqanik arlalinnik innersuussutaanikunik imaqarpoq. Taamatuttaaq suliamut 2018-3 aamma 2019-2 nittartakkanni tamanut saqqummiunneqarnikut innersuuppakka.

Paasinninnera naapertorlugu inatsisitigut tunngavissat pingaarnert Qallunaat Nunaanni aamma Kalaallit Nunaanni assigiipput. Taamaattumik naggasiullugu qallunaat atuakkiaanni pisortani oqartussaasut piffissaq suliap suliarineqarneranut atorneqartussaag pillugu piumasaqaatit qallunaat inatsisitigut atuakkiaanni, ilanngullugu Niels Fengerip allallu saqqummersitaat, Forvaltningsret (2018-imeersoq), qup. 688 tulliuttullu aamma Hans Gammeltoft-Hansenip allallu saqqummersitaat Forvaltningsret, aappassaanik saqqummersitaq (2002), qup. 903 f. innersuussutigaaakka.

3.5. Suliamik uninngatitsineq/inaarsinnginneq

Suliani, innuttaasup suliniuteqarneranik aallaavillit, suliap paasineqarnissaanut nalinginnaasumik innuttaasup immikkut soqutiginninnerisarpaa.

Oqartussaasup suliamut misissuinissamut pisussaafigisaa pillugu oqartussaasunut ilitersuummi imm. 5-imi oqartussaasut paasissutissanik pisariaqartunik tunngaveqartussaanerat pillugu, nittartakkanni www.ombudsmand.gl-miittoq innersuussutigaaara.

Meeqqat pillugit peqqussummi imaluunniit meeqqat tapersersorneqarnissaannut inatsimmi angajoqqaatut oqartussaasumit angerlartitsinissamik noqqaassut pillugu kommunip suliamik uninngatitsisinnaatitaanera pillugu aalajangersagaqanngilaq. Imaappoq, meeqqamik angerlarsimaffiup avataanut inissinneqarimasumik angerlartitsinissamik noqqaassuteqartoqarpat kommune angajoqqaatut oqartussaassusilimmut aalajangiissuteqarnissamik pisussaaffeqartoq.

3.6. Suliami pineqartunut nalunaaruteqartarnej

Suliat suliarineqartarnerat pillugu inatsimmi allaniluunniit inatsisini attuumasuteqartuni, suliap sivitsornerani, innuttaasumut oqartussasup qaqugukkut attaveqartussaananik malittarisassanik imaqaanngillat. Kisianni ingerlatsinermi ileqqorissaarneruvoq, ilaatigooriarluni suliamik suliaqarnerup ingerlanera pillugu, oqartussaasumit pineqartunut ilisimatitsisarnissaq.

Pisuni arlalinni ingerlatsinermi ileqqorissaarneruvoq, suliap ingerlanera pillugu suliami pineqartunut ilisimatitsisarneq. Periuseq taanna suliat suliarineqartarnerat pillugu inatsimmi 1994-imeersumi imm. 205-207-imi ersarissarneqarpoq:

205. Ingerlatsinermut oqartussaasup suliassap suussusia pissutigalugu imaluunniit oqartussaaffimmi tassani nalinginnaasumik suliarineqartarnerat pissutigalugu suliassaq tiguneraniit piffissap sivikinnerusup iluani aalajangiivigisinnaanngikkuniuk oqartussaaffiup suliassamut tunngassuteqartoq nalunaarfigisariaqarpaa suliassap qanoq inissisimaneranik aammalu ajornanngippat paasissutissillugu suliassap qaqugu aalajangiivigineqarnissaa oqartussaaffimmit naatsorsuutigineqarnersoq.

206. Oqartussaaffiup aammattaaq suliassamut tunngassuteqartoq ilisimatittariaqarpaa suliassaq sivikinnerusumik suliarineqartussaagaluq immikkut pissuteqartumik pisarnermit sivilunerusumik suliarineqartariaqalerpat.

207. Suliamut tunngassuteqartumit allakkat nukingisaarutit suliassallu suliarineqarnerani piffissamik atorneqartumik naleqquttumik tunngavilersukkat ingerlaanartumik akineqartariaqarput. Akissuteqaammi ilisimatitsissutigineqartariaqarpoq suliassaq qanoq inissisimanersoq aammalu ajornanngippat ilisimatitsissutigineqarluni suliassap aalajangiivigineqarnissaa oqartussaaffiup qaqugu naatsorsuutigineranaa."

Aalajangiinerup qaqugu pinissaanik pisortat eqqoqqissaartumik naatsorsuuteqarlutik nalunaarutigineqarnissaat piumasaqaataanngilaq. Kisianni ingerlatsi-

nermi ileqqorissaarnerup manna malitsigivaa, tassalu suliap paasissutissat pigineqartut suliallu suunera pissusialu allallu aallaavigalugit inaarlugu qaqugu suliarineqarnissaanik piffissaliussatut naatsorsuutigisaq oqartussaasup oqaatigisariaqaraluaraa. Tamanna assersuutigalugu aalajangiinerup pinissaata qaqugukut naatsorsuutigineqarnera eqqarsaatigalugu piffissamik taasinikkut pisinnaavoq.

Oqartussaasup piffissaq suliap suliarineqarneranut atorneqartartussaq nalinginnaasoq qaangerpagu imaluunniit oqartussaasup qaqugu aalajangiinissamik naatsorsuutigisamisut innuttaasumut siusinnerusukkut oqaatigisimasaa qaangerneqarpat, suna pillugu aalajangiisoqarsimannginneranik oqartussaasup suliame illua'tungiusumut nammineq suliniuteqarnermigut ilisimatitsisariaqarnera ingerlatsinerme ileqqorissaarnerme tunngaviit ilagaat.

Oqartussaasup piffissaq suliap suliarineqarneranut atorneqartoq pillugu ilitsersuinerme suliallu ingerlanneqarnera pillugu nalinginnaasumik paasissutissiiviinnartigut, soorlu oqartussaasup nittartagaatiguinnaq, naammassineqarsinnaanngilaq. Ilitsersuinerli oqartussaasup innuttaasullu akornanni pisariaqarpoq, soorlu allakatigut, e-mailikkut oqarasuaatikkuunniit toqqartumik attaveqatigiinnerisigut.

Ukiumut nalunaarusianni 1995-imeersumi, immikkoortoq 3-mi erseqqissaatigaa-ra, suliap sivitsortoorneranik oqartussaasoq innuttaasumut nalunaaruteqartariaqartoq, kinguaattoornerup sumik peqquteqarnera apeqqutaatinnagu.

Suliami allami oqaatiginikuuara, oqartussaasoq piffissaq suliap suliarineqarneranut atorneqartoq pillugu naatsorsuutigisamik innuttaasumut suli paasissutissiisimatinnagu, suliani aalajangersimasuni oqartussaasup innuttaasumut qaammatit pingasukkarlugit ilisimatitsisarnera ingerlatsinerme ileqqorissaarnerussasoq. Piffissaq suliamek suliarinninnermut atorneqartoq sivilukulussasoq oqartussaasup qularinngikannerpagu ukiumut ataasiarluni marloriarluniluunniit ilisimatitsisarneq naammassinnaavoq. Innersuussutigaa-ra 2019-4 oqaaseqaatiga.

Oqartussaasunut ilitsersuummi immikkoortoq 2-p ataani immikkoortoq 3, nittartakkanni [www. ombudsmand.gl](http://www.ombudsmand.gl)-mi takuneqarsinnaasoq aamma innersuussutigaara.

Tamatuma saniatigut Niels Fengerip allallu atuakkiaanni "Forvaltningsret"-imi (2018-imeersumi) qup. 390 aamma 694 tullialu aamma Niels Fenger, Forvaltningsloven med kommentarer (2013-imeersoq) qup. 269 aamma Karsten Revsbechip atuakkiaa Forvaltningsret – Sagsbehandling, arfineq-aappassaanik saqqummersitaq (2014-imeersoq) qup. 41 innersuussutigaakka.

4. Kommuniip isumaa

Kommuni oqaaseqaatimini 4. marts 2024-meersumi ima oqaaseqaateqarpoq:

"[A]-p [...] pillugu naammagittaalliutaa pillugu akissuteqaat:

Kommune Qeqertalik [...] isumaginnittoqarfik 13.10.2023-mi allakkatigut naammagittaalliummik tigusaqarpoq.

Suliamik ingerlatsineri paasissutissat toqqammaviit noqqaassutigisasi pillugit misissuineri allagaatit allat nassaarineqarput.

Imaappoq, Kommune Qeqertalik [...] -mi isumaginnittoqarfik aalajangiissuteqanngitsoq A-illuunniit meeqqami angerlartinneqarnissaanik noqqaassutaanut akissuteqartoqarsimanngitsoq, tassani aamma aalajangiissuteqartoqanngitsoq iliuusissatullu pilersaarut suliarineqarsimanani.

Iliuusissatut pilersaarutit suliarineqarsimannginneranut paasissutissat kingullit: [...] meeqqanut inuusuttuaqqanullu immikkoortortaqqarfimmi sullissisup mailianit takuneqarsinnaavoq, [A] iliuusissatut pilersaarusiornissaq pillugu aggersarneqarami takkussimanngitsoq. Maluginiaqqussavarput, [A]-p meeqqami angerlartinneqarnissaanut qinnuteqaataa pillugu suliaq ingerlaannassammat.

Naggataatigullu oqaatigisinnaavarput, Kommune Qeqertalik [...] Isumaginnittoqarfimmi sulisut marluk nappaassuarmik eqqugaaqqammata katsorsartinnermillu nalaani sulinngiffeqarlutik."

5. Uanga naliliinera

5.1. Angerlartitsinissamik noqqaassuteqarnerup allakkatigoornissaanut piumasaqaateqarneq

27. november 2012-imi A kommunimut saaffiginnippoq angerlartitsinissamik oqariartuuteqarluni. A allakkatigut angerlartitsinissamik qinnuteqarnissaanik sullissisumit piumaffigineqarpoq.

7. maj 2021-mi kommune A-mik, suli meeqqaminik angerlartitserusuttumik ataatsimeeqateqarpoq. Ataatsimiinnermi 7. maj 2021-mi angerlartitsinissamut noqqaassummik allakkatigut tunniussinissaanik A ilitersorneqaqqippoq.

Meeqqat pillugit peqqussummi, meeqqat tapersersorneqarnissaannut inatsimmi allaniluunniit inatsisini angerlartitsinissamik noqqaassutip allakkatigoornissaanut toqqammavissamik takusaqarsinnaanngilanga.

Tamanna tunngavigalugu naliliinera unaavoq, kommunip 27. november 2012-imi 7. maj 2021-miluunniit ataatsimiinnermi angerlartitsinissamik noqqaassutip allakkatigoornissaanik piumasaqaateqarnera inatsisitigut tunngavissaqanngitsoq. Taamaalilluni naliliinera unaavoq, A-p oqaasiinnakkut angerlatitsinissamik noqqaassuteqarneraniik, angerlartitsinissamut periarfissat qulakkeerneqarnissaat paasiniarlugu suliamik kommune ingerlatitsisussaasimagaluarpoq.

A-p angerlartitsinissamik noqqaassuteqarnerata allakkatigut pinissaanik kommunip piumasaqaatigisaa isorisarialittut isumaqarfigivara.

Oqaatigissavara, naliliinera unaammat, A-p angerlartitsinissamik noqqaassutaata allakkatigut pinissaanik piumasaqaat pisariaqanngitsumik suliamik suliarinninnermut sivitsorsaataasoq.

Inassutigissavara, kommunip qulakkiissagaa, angajoqqaatut oqartussaasuseqartumit angerlartitsinissamik noqqaassuteqarnerup allakkatigut pinissaanik piumasaqarnissaq inatsisitigut tunngavissaqanngitsoq sullissisut ilisimassagaat.

5.2. Piffissaq suliap suliarineqarneranut atorneqartoq

Paasinninnera unaavoq, B1 aamma B2 2012-imi, piffissami taaneqanngitsumi angerlarsimaffiup avataanut kommunimit inissinneqarsimasut.

Oqaatigissavara, kommunip A-mut iliuusissatut pilersaarummi B1 aamma B2 2014-imi angerlarsimaffiup avataanut inissinneqarnerat innersuussutigimmagu. Suliamut allagaatinit allanit tamanit B1-p aamma B2-p 2012-imi

angerlarsimaffiup avataanut inissinneqarsimanerat kommunimit innersuussutigineqarpoq. Taamaattumik B1-p aamma B2-p 2012-imi angerlarsimaffiup avataanut inissinneqarsimanerat tunngavigivara.

Suliami allagaatinit ersinngilaq, inissiineq allakkatigut imaluunniit oqaasiinnakkut nalunaarsuilluniluunniit allattukatigut aalajangiinerunersoq, taamaalillunga erseqqissumik takusinnaanngilara A akuersiseqqaarlugu inissiineq pisimanersoq.

27. november 2012-imi A kommunimut saaffiginnippoq, tassani angerlartitsinissamik kissaateqarnini oqaatigalugu.

21. december 2012-imi, 4. juli 2013-imi 8. oktober 2013-imi aamma 13. december 2013-imi A meeqqami angerlartinneqarnissaanik kommunimut kissaateqaqqippoq, soorlu aamma A-p suliami siuariaateqartoqartannginnera naammaginagu oqariartuuteqarsimasoq.

13. december 2013-imi kommunimit A-mut oqaatigineqarpoq, angerlartitsinissamik noqqaassutaata itigartitsissutigineqarnissaa akimortumik suleqatigiissitanit innersuunneqarsimasoq. Suliamut allagaatit akornanni, akimortumik suleqatigiissitanit innersuussuteqartoqarsimanera takussutissaqanngilaq, soorlu aamma Ilaqutareeqarnermut Ataatsimiititaliamit aalajangiussamik soqanngitsoq. Taamaalillunga tunngavigivara A-p meeraasa angerlartinneqarnissaanni itigartitsinermi, 13. december 2013-ip kinguninngua aalajangiisoqarsimanngitsoq.

Maluginiarpara, kommunip allakkamini 24. april 2024-meersumi A-mut oqaatigineqartoq, 2013-imi oqaasiinnakkut angerlartitsinissamik itigartitsilluni aalajangiissuteqarsimasoq. Suliamut allagaatit akornanni oqaasiinnakkut aalajangiineq tunngavilugu nalunaarsuiffimmut allattukkanit takusaqarsinnaanngilanga. Taamatuttaaq kommunip oqaaseqaatimini 4. marts 2024-meersumi uannut oqaatigimmagu, angerlartitsinissaq pillugu suliamut qaquguk-kulluunniit aalajangiisoqanngisaannarsimasoq.

Tamanna tunngavigalugu naliliinera unaavoq, kommune 2013-imi oqaasiinakkut angerlartitsinissap itigartitsissutiginiissanut aalajangiissuteqarsimanngitsoq.

Meeqqat angerlartinneqarnissaat siunertaralugu A 11. september 2015-imi Ilaqutariit Illuannut innersuunneqarpoq.

A-p meeqqami angerlartinneqarnissaannik kissaateqarnini pillugu suliap killiffia pillugu, 28. februar 2017-imi aamma 28. november 2019-imi kommunimut nukingisaareqqippoq.

Tamatuma kingorna A-p angerlartitsinissamik noqqaassutaa tunngavigalugu, kommune suliamut aalajangiissuteqarsimanersoq allagaatini takusinnaanngilara.

Kommune 2. februar 2021-mi, 7. maj 2021-mi, 26. maj 2021-mi, 9. juni 2021-mi, 14. juni 2021-mi aamma 24. juni 2021-mi A-p meeqqami angerlartinneqarnissaannik suli kissaateqartumik ataatsimeeqateqarpoq. Suliami allagaatit akornanni noqqaassutigineqartut tunngavigalugit kommune A-mut aalajangiiviginissimanersoq takusinnaanngilara.

Suliani allagaatinit erserpoq, kommune A-p angerlartitsinissamik noqqaassutigisaa tunngavigalugu suliap ingerlasimanera pillugu INUIT ataatsimiititaliaanut ingerlateqqitassamik allaaserinnissimasoq. Paasinninnera unaavoq, ataatsimiititaliamit suliaq suliareqqitassanngorlugu 6. oktober 2021-mi ingerlat-sivimmut utertinneqarsimasoq.

20. maj 2022-mi kommune A-mik ataatsimeeqateqarpoq, tassani angerlartitsinissamik A kissaateqarluni noqqaassuteqaqqippoq.

1. juni 2022-mi A suliap killiffia pillugu kommunimut nukingisaaruteqarpoq, tassa meeqqami angerlartinneqarnissaannik kissaateqarnini oqaatigeqqillugu.

Kommune allakkatigut 24. april 2024-meersutigut A-mut ilitersuuteqarpoq, iliuusissamik pilersaarummi anguniagassat anguneqareeriarpata angerlartitsinissamik qinnuteqaqqeqqullugu, taamatullu sulisut akornanni napparsimasoqarnera aamma kommunimit innersuussutigineqarluni.

Kommunip oqaaseqaatimini 4. marts 2024-meersumi uannut oqaatigivaa, suli kommunimit aalajangiissuteqartoqarsimanngitsoq, allatulluunniit angerlartitsinissamik noqqaassut pillugu, A akineqarsimanngitsoq.

Taamaattumik paasinninnera unaavoq, kommune 2012-imi B1-p aamma B2-p angerlarsimaffiup avataanut inissinneqarneranniik B1-p aamma B2-p 18-inik ukioqalernissaannut, A-p angerlartitsinissamik noqqaassuteqartarnerpassui pillugit qaqugukkulluunniit aalajangiissuteqartoqartarsimanngitsoq.

Kommunip ukiut qulit sinnerlugit piffissaq suliap sularineranut atugaa ajorluinnartutut illersorneqarsinnaanngitsutullu isumaqarfigaara.

Naliliinera unaavoq, iliuusissatut pilersaarummi anguniagaasut anguneqariarpata A-p angerlartitsinissamik qinnuteqaqqissinnaanerani allakkatigut 24. april 2024-meersutigut kommunip ilisimatitsinera naammanngitsoq – pingaartumik kommune siusinnerusukkut angerlartitsinissamik noqqaassuteqarnerit tunngavigalugit aalajangiisarsimanngimmat.

Naliliinerattaq unaavoq, kommunip piffissaq suliap sularineqarnerat atugaata, A-p inatsisitigut innarlitsaalineqarnerani annertuumik innarliisimasoq, tassa meeqqat 2012-imi angerlarsimaffiup avataanut inissinneqaqqaarneranniit maannamut kommunip piffissaq suliap sularineqarnera pillugu Isumaginninnermut Naammagittaalliuteqartarfimmut naammagittaalliornissamik periarfissaqarnikuusimanngimmat.

Naggataatigullu oqaatigissavara, ukiut qulit ingerlanerini siusinnerusukkut maannamullu, sullissisunik napparsimasoqarnera sulinngitsoqarneraluunniit tunngavigalugit kommune A-mut aalajangiiviginngitsoorsinnaanngimmat.

Oqaatigissavara, B1 2. januar 2022-mi 18-inik ukioqalermat. Oqaatigissavaralu B2 17. december 2024-mi 18-inik ukioqalerluni.

5.3. Suliamik inaarsinani unititsineq

Kommune allakkatigut 24. april 2024-meersutigut A-mut ilisimatitsivoq, angerlartitsinissamik noqqaassutaa unitsiinnarneqarsimasoq, kommunimi sulisunik napparsimasoqartarnera peqqutigalugu.

Meeqqat pillugit peqqussummi imaluunniit meeqqat tapersersorneqarnissaat pillugu inatsisip malitarisassaani, kommunip pisariaqartunik sulisussaqaannginnerani kommunip suliamik unititsiinnarsinnaanera tunngavissaqarnerisq takusinnaanngilara.

Taamaattumik naliliinera unaavoq, A-p angerlartitsinissamik noqqaassutaata unitsiinnarneqarnera qaqugukkulluunniit inatsisitigut tunngavissaqarnikuunngilaq.

Kommunip suliami unititsiinnarsimanera isorisalerujussuartut isumaqarfigaara.

Tassunga atatillugu innersuussutigaa, angerlartitsinissaq pillugu kommune oqartussaasusutut inatsisit toqqammavigalugit kisimi aalajangiisinnaassuseqarmat, taamaattumik kommune suliamik itigartitsissuteqarsinnaanani, illuatu-ngaategulli aalajangiinissamut pisussaaffeqarmat.

Inassutigaa, naak meeqqanut inuusuttunullu immikkoortortami sulisussanik amigaateqartoqaraluartoq, [...] innuttaasunut aalajangiiviginnittarnissaq kommunimit qulakkeerneqassasoq.

5.4. A pillugu nalunaarutit

Suliami allagaatinit erserpoq, 2012-imiit kingornalu B1-p aamma B2-p angerlartinneqarnissaanik noqqaassut pillugu kommune arlaleriarluni A-mik ataatsimeeqateqartarsimasoq.

Paasinninnera unaavoq, amerlanerpaatigut A nammineerluni kommunimik ataatsimeeqategarniartarsimasoq, tassa B1-p aamma B2-p angerlartinneqarnissaannik periarfissat pillugit kommunimut saaffiginnittuarter-simammat.

Paasinninnerattaq unaavoq, A suliap killiffia pillugu kommunimut nukingsaaruteqaqattaartarsimasoq, kiisalu kommunimik suleqatiginnikkumalluni ersarissumik oqariartuuteqarsimasoq.

Naggataatigullu paasinninnera unaavoq, A kommunimut suliap ingerlanneqarnera pillugu oqariartuuteqartarsimasoq, kommunimiillu ingerlaavartumik nalunaarfigineqarneq ajornini naammagittaalliutigalugu, kiisalu nalunaaruteqartannginneq A-mut misigititsisoq, meeqqat ataavartumik peersinneqarsimasut.

Suliami allagaatinit, A-mik ataatsimeeqategartarnerit kingorna suliap suliarineqarneranik malitseqartitsilluni, piffissaq suliap suliarineqarneranut atorneqartoq pillugu aamma A-p angerlartitsinissamik noqqaassutaa pillugu pissutsit eqqarsaatigalugit kommunip nammineerluni suliami killiffik pillugu naatsorsuutigisani pillugit, A-mut kommunip nammineerluni iliuuseqarnermigut attaveqartarsimaneramik takusaqarsinnaanngilanga.

Paasinninnera unaavoq, kommune A-mut attaveqartarsimanngitsoq angerlartitsinissamik noqqaassuteqartarnerini ukunani

- ataatsimiinneq 13. december 2013-imiit 15. juli 2015-imut
- ataatsimiinneq 11. september 2015-imiit 28. februar 2017-imut
- ataatsimiinneq 28. februar 2017-imiit 28. november 2019-imut
- ataatsimiinneq 28. november 2019-imiit 2. februar 2021-mut
- INUIT ataatsimiititaliamit 6. oktober 2021-mi suliap 20. maj 2022-mi ataatsimiinnissamut utertinneqarnera, kiisalu
- ataatsimiinneq 20. maj 2022-miit 24. april 2024-mut

Taamaalillunga paasinninnera unaavoq, A-p angerlartitsinissamik noqqaassutaanut suliap killiffia pillugu kommune A-mut ataavartumik nalunaaruteqartarsimanngitsoq.

Kommunip taamak ukiut amerlatigisut A-mut nalunaaruteqartarsimannginnera sakkortuumik isorisariaqartutut isumaqarfigaara.

Kommune qinnuigaara tikkuakkama kommune qanoq iliuuseqarnissamut pissutissaqalersinneraa uannut nalunaarutigeqqullugu.

Kommune Qeqertalimmi kommunalbestyrelsimut aamma Inatsisartut Inatsisinik Ataatsimiititaliaannut nalunaaruteqarpunga. Taamaaliorpunga Ombudsmandi pillugu inatsimmi § 23-kkut aalajangersarneqarmat, pisortat ingerlatsivianni annertunerusumik kukkussuteqartoqarsimanissaa imaluunniit sumiginnaasoqarsimanissaa ilimagisariaqartoq suliamik misissuinerma takutippagu Inatsisartut Inatsisinut Ataatsimiititaliaannut aamma Naalakkersuisunut imaluunniit kommunalbestyrelsimut tamanna pillugu nalunaaruteqassasunga.

Allakkat ukua assilinerat B1-mut aamma B2-mut nassiuppakka.

Oqaaseqaat manna oqaaseqaammi pineqartut kikkuuneri ilisarnarunnaarsillugit nittartakkanni tamanut saqqummiunneqarumaarpoq 2025-milu ukiumoortumik nalunaarutinni eqqaaneqarumaarluni.

SULIAP INGERLASIMANERATA ALLAASERINEQARNERA

Suliamut allagaatinit oqatigineqarpoq, A-p meerai, B1 aamma B2 2011-mi angerlarsimaffiup avataanut inisinneqartut. Allagaatinit oqatigineqarpoq, A-p 27. maj 2011-mi meeqqat angerlartinneqarnissaannik noqqaassuteqarnera tunngavigalugu angerlartinneqartut.

A-p meerai 2012-imi angerlarsimaffiup avataanut inissinneqaqqipput.

Nalunaarsuutinit allattukkani 12. juli 2012-imeersoq ilaatigut imatut oqaasertaqarpoq:

"[...]"

Angutaannut tunngatillugu iliuusissamik pilersaaruserussit pitsaassagaluarpoq, angajoqqaarsiaasullu ilisimatillugit, angumminnut attaveqaannarnissaat pisariaqartoq, tassami angutaat imminut suliarereeriarpat angumminnut uteqqittussaammata, inissiinermi ataavartuunngimmat.

[...]"

Nalunaarsuiffimmut allattukkani 27. november 2012-imeersoq ilaatigut imatut oqaasertaqarpoq:

"Suleqatigiinnerup ajornera pillugu maanga saaffiginnippoq.

Meeqqat angerlartinniarnert pillugu qulaani allagaqartoq oqaloqatigivara.

[...] ingerlalluarpoq assullu iluarusuutigalugu meeqqami ilagisarneri, soorlu tamanna aamma meeqqanit maluginiarneqalereersoq, angajoqqaarsiaminnullu angerlarnissartik nalleraangat aliasulertartut. Oqaatigivaa taamanikkussamut angerlartinneqareersimanngippata meeqqani juullisioqatigerusullugit, kissaatiginerpaalluguli angerlartinneqarnissaat. Nassuiaappara ilisimalikkat aallaavigalugit inatsisit naapertorlugu meeqqanik angajoqqaanut angerlartitsinissaq soorngunalimi pingaartikkipput, soorlu aamma nammineq meeqqami [...] ilaqutariit paarsisartuminniit peersitaasimanerat aqusaarsimagaat, tassa meeqqat, siunissami taamatut pisoqaqqinnissaa ernumagalugu annilaartaatigisarmassuk. Tassani eqqarsaatissippara tigulluarnereganik.

Allakkiornissaanik noqqaavigaara, soorlu aamma oqarfigigiga angajoqqaarsiat allakkatigut oqaaseqaasiussasut, allakkiallu tiguneqariarpata ataatsimiititaliamut (SU) aalajangiiffigisassatut saqqummiunneqarumaartut. Angajoqqaarsiat piaartumik oqaaseqaasiornissaannik/nalunaarusiornissaannik noqqaavigineqassapput.

Oqaloqatigiinnermut qujavoq.

Nalunaarsuiffimmut allattukkani 21. december 2012-imeersoq imatut oqaasertaqarpoq:

"A-p nal. 13:00, meeqqat angerlartinneqarnissaannut allakkatigut noqqaas-sutimi sumut killinnera pillugu saaffiginnissutaalu pillugu ataatsimeeqatiginerani aamma eqqartueqatigivara, [...]. Nassuiaappara, ullumikkut nalunaarfigineqarumaartoq meeqqat 03.01.2013-ip tungaanut angerlartinneqassanersut, neriullungalu ulloq taanna ataatsimiinneq aamma suliamik naliliinissamut atatillugu atorneqarsinnaassasoq, kisiannili naliliineq naapertorlugu ilimanangitsoq meeqqat angumminnut angerlarsinnaanerit. Ilisimatitsissummut qujavoq, pisunillu eqqartuilaarluni, [...] utertusnaanini pillugu tuaviortasippaq."

Nalunaarsuiffimmi allattukkani 4. juli 2013-imeersoq imatut oqaasertaqarpoq:

" [A] oqarasuaatikkut oqaloqatigivara, tassani sullissisoq [...] aamma peqataavoq. Iliuusissatut pilersaarut suliarineqareermat atsiornissaanullu piareermat [...] nassiunneqartoq nalunaarutigineqarpoq, [A] atsiorusussimanngitsoq, nassuiaapparput iliuusissatut pilersaarut atsiorneqariarpat meeqqat angerlartinneqarnissaat pillugu suliap suliarineqarnera aallartinneqarumaartoq, aammalu iliuusissatut pilersaarusiaq malinneqarpat meeqqat angerlartinneqarnissaat aatsaat piviusunngorsinnaasoq, tassani [A]-p aatsaat paaserpasippaa, meeqqanik angerlartitsiniarnermi iliuusissatut pilersaarutip suna siunertarineraa. Ilisimatinneqarnerminut qujavoq, oqarlunilu tamanna ilisimasimasuuguniuk qangali atsiorsimassagaluarluni. Suliap uninngatinneqarsimanera akisussaaffiginianngilaa, ajuusaarutiginerarparpullu suliaq uninngatinneqarsimammat, oqarfigaarpullu paasissutissat tigusagut tunngavigalugit ikiorsiissutit unitsissinnaasimagaluarlugit aatsaallu ataatsimeeqatigiinneq una naammassippat aallarteqqullugit, paasinnippoq atsiorniarlunilu oqarluni. Imminut suliarinini (selv-hjælpsterapi) ingerlatiinnarniarpaq oqarlunilu tapersersortini assut iluaqutaasimasoq. Meeqqat angerlarsimanerulersimapput, pisullu pillugit inissisimanertik eqqartortarlugu, ilaqutariittut oqaloqatigisimavai qaqugu angerlarsinnaanersut, apeqqusersimallugulu isumaqatigiissut ingerlanersoq, qujallunilu tassunga tunngasumik ilisimatinneqarnerminut. [...]"

A-mut tunngatillugu kommune allakkatigut 8. oktober 2013-i-meersutigut ima nalunaaruteqarpoq:

"Pill.: Meeqqannut illinnullu suliap suliarineqarnera pillugu saaffiginnissutinnut akissuteqat.

Qaasuitsup kommuniani [...] isumaginninnermut ingerlatsiviani Kiffartuussivimmit meeqqanut ilinnullu suliap suliarineqarneranut ilisimatinneqartannginnerit pillugu allakkatigut saaffiginnissutit tiguarpot.

Matumuuna nalunaarutigissavarput, kingullermik nunaqarfinnut angalalluni [...] 13.06.2013-imi tikeraarnermi, angajoqqaarsiaasut A-lu suleqatigalugit meeqqavit angerlartinneqarnissaannik kissaatit pillugu iliuusissatut pilersaarut naammassineqarmat, iliuusissatut pilersaarummi angerlartitsinissamut anguniakkat allattorneqarput.

04.07.2013-imi oqarasuaatikkut ilisimatinneqarpugut, iliuusissartut pilersaarut [A]-mit suli atsiorneqarsimanngitsoq, tamannalu pillugu sullissisoq [...] peqatigalugu oqarasuaatikkut nassuiaassutigineqarpoq, iliuusissatut pilersaarummi anguniagassat anguneqartinnagit meeqqat angerlartinneqarsinnaanngitsut, iliuusissatut pilersaarut atsiorneqanngitsoq naammassineqartutut isigineqarsinnaanngimmat, soorlu aamma tamanna [...] nunaqarfinnut angalanermi erseqqissaatigineqartoq.

04.07.2013-imi iliuusissatut pilersaarut [A]-mit atsiorneqarpoq, iliuusissatullu pilersaarummi atsiukkami anguniakkat anguneqariarpata, angerlartitsinissamik suliaq akimortumik suleqatigiissitat ataatsimiititaliaanut, kingornalu Ilaqutareeqarnermut Ataatsimiititaliamut saqqummiunneqassaaq. Tamanna ajungitsumik tiguneqarpoq.

[A]-p meeqqami angerlartinneqarnissaat pillugu qinnuteqaataa inatsit malillugu suliarineqaleruttorpoq, oqaaseqaammik [...] piniartoqassaaq, angajoqqaarsianit oqaaseqaammik tigusaqareerpugut, atuarfimmii oqaaseqaammik pissarseriarutta taanna akimortumik suleqatigiissitanut saqqummiunneqassaaq, tamatumalu kingorna suliaq aalajangiiffigineqarfissaanut Ilaqutareeqarnermut Ataatsimiititaliamut saqqummiunneqassaaq.

Suliaq suliarineqarnerani Meeqqanik inuusuttunillu ikiorsiisarneq pillugu Inatsisartut Inatsisaat nr. 1, 15. april 2003-mi § 27 aallaavigineqarpoq.

§§ 9 aamma 10 naapertorlugit suliniutit unissapput suliniuteqarnermi siunertaq anguneqarpat, ilanngullugit iliuuseqarnissamik pilersaarummi anguniakkat anguneqarpat, imaluunniit suliniuteqarneq siunertanik naammassinnikkunnaarpat.

§ 28. Ilaqutariinni inissiinerup taamaatinnissaa aalajangiunneqartinnagu, ilaqutariit paarsisut oqaaseqartinneqassapput. Meeraq kommunerivitami avataani ilaqutariinnut inissinneqarsimappat, meeraq kommune uninngavigisaa oqaaseqartinneqassaaq.

Suliamik suliarinninnermi inatsit aallaaviuvoq.

Nalornissuteqassaguit sullissisorisannut saaffiginnissinnaavutit.

[...]

Nalunaarsuiffimmut allattukkani 13. december 2013-imeersoq imatut

oqaasertaqarpoq:

”[A] [...] isumaginninnermi ingerlatsivimmut saaffiginnippoq meeqqani pillugit suliaq sumut killinnera paasiniarlugu, nassuiaavoq tikeraarnerup nalaani oqaasiinnakkut oqarfigitissimalluni meeqqani qanittumi angerlartissinnaagai aammalu uggoralugu oqaasiinnakkut oqarfigitiinnarnini pillugu. Nassuiaanneqarpoq tikeraarnerup nalaani siuariaateqarsimanera aallaavigalugu iliuusissatut pilersaarutip suliarineqarnera aammalu paarsisartut suleqatigalugit iliuusissatut pilersaarut suliarineqartoq nassuiaanneqarpoq, [...]”

Nalunaarsuiffimmut allattukkani 15. juni 2015-imi Kommunip aamma A-p

ataatsimeeqatigiinnerat aallaavigalugu suliarineqartumi ima oqaasertaqarpoq:

"[A]-p meeqqami angerlartinneqarnissaanut kissaataa pillugu iliuusissatut pilersaarut suliarineqarpoq. [A]-p meeqqami nukarliit pingasut B3, B1 aamma B2 angerlarsimaffiup avataanut inissinneqarsimasut angerlartinneqarnissaannik noqqaassuteqarpoq.

[...] juullisioriarnermini inimik attartorsinnaariami [...].

[A]-p meeqqaminik angerlartitsiniarnera pillugu iliuusissatut pilersaarut suliaralugu naammassineqarpoq, [...].

Ilaqutariit illuanni perorsaariaaseq pillugu oqaloqatiginnittarnissamut immersu-gassaq immersorneqarpoq. Nalunaarfigivara suliaq ataatsimiissutigineqareerpat aggersarneqarumaartoq. Paasinnilluarpoq, "

Suliamut allagaatinit erserpoq, A meeqqat angerlarsimaffiup avataanut inissinneqarsimasut angerlartinnissaat siunertaralugu 11. september 2015-imi Ilaqutariit Illuanni oqaloqateqartarnissamut innersuunneqartoq.

Innersuussummi ilaatigut makkua oqaatigineqarput:

"[A]-p meerai nukarliit [B3], [B2] aamma [B1] angerlarsimaffiup avataanut inissinneqarput. Meeqqat angerlartinneqarnissaannut [A] piareersarusuppoq, Ilaqutariillu Illuanni oqaloqatiginnittalerusulluni. Meeqqanik perorsaaneq eqqarsaatigalugu nukittorsarneqarusuppoq.

[A]-p qinnuteqaataa eqqartuiffigerusupparput.

Innersuussutigineqarpoq, [A] Ilaqutariit Illuanni oqaloqatiginnittalissasoq."

Nalunaarsuiffimmut allattukkani 23. januar 2017-imeersumi kommunip A-lu ataatsimeeqatigiinnerat tunngavigalugu suliarineqartumi ima oqaasertaqarpoq:

"[A] attavigineqarpoq tusarniaavigineqarluni iliuusissatut pilersaarutip sularinissaa eqqarsaatigalugu qanoq piniarnersoq. Allakkanik tunniussivoq ilanngussatut kakkiunneqartunik, tassani meeqqani pillugit paasisaqaqqikkusulluni, aammalu eqqaallugu ernini [B3] juullili sioqqulluguli imminermini sinittartog, unnukkullu imminerminut angerlartuaannarmat tigorussullugu. Angerlartitsiniarneq pillugu allakkatigut qinnuteqaatip immersorlugu naammassinissaanik qinnuigineqarpoq, paasitinneqarluni meeqqat ukiut marluk sinnerlugit angerlarsimaffiup avataanut inissinneqaaqqareernikuummata, angerlartitsinissamik aalajangiisoqassappat piu-masaqaataasut naammassineqareersimassammata, aammalu SU taannaasoq aala-jangiisuusussaq, tamanna paasilluarpaa. Ilisimatinneqarpoq [...] neqerooruteqarnermi immersugassamik nassiunneqarumaartoq."

Nalunaarsuiffimmi allagaatinit 28. februar 2017-imeersoq ima oqaasertaqarpoq:

"[A] oqaloqatigineqarpoq meerai pillugit. [B3] kiisalu iliuusissatut pilersaarutip suliarineqarnissaa pillugit oqaloqatigineqarpoq. A meeqqat angerlartinneqarnissaannut suliap sumut killinneranik apeqqutilliivoq, suleqataarusuppoq. Iliuusissatut pilersaarut [B3]-mut tunngasoq aqagu pingasunngorneq 01.03.2017-imi suliarineqassaaq. A nassuaanneqarpoq inatsit aallaavigalugu meerai angerlarsimaffiup avataanut inissinneqartut, aammalu [...] inunnik isumaginnittoqarfik suliap aalajangiiffiginissaanut pisinnaatitaaffeqanngitsut.

Oqaatigivaa paatsiveqartinnagu suliap suliarineqarnera, suliap suliarineqarnera pillugu ilisimatinneqanngisaannarami. Kisianni siusinnerusukkut arlaleriarluni aggersarneqartarsimavoq, takkutissanaili.”

Nalunaarsuiffimmi allattugaatinit 1. marts 2017-imeersoq ima oqaasertaqarpoq:

” [A] isumaginnittoqarfimmut allakkanik tuniussinikuunera ernini [B3]-p angajoq-qaarsiaasa [...] -kut allagarnikkut tigummissaqarunnarniarlutik allagaqarneq kingunerisaanik atataasumut angerlarnissata tungaanut [B3] ataatamini najugaqarallarnissaminut [A] oqaloqatigineqarpoq. Iliuusissatut pilersaarutit [A]-mit [B3]-mut tungasut suliarinissai kinguartikkallarput [...] -p tikinnissaata tungaanut.”

Nalunaarsuiffimmi allattukkani 28. november 2019-imeersoq imatut

oqaasertaqarpoq:

”[A] saaffiginnippoq meeqqani tutsiuffiginngikkaangamigit tutsiuttoqarneq ajortoq tamannalu pillugu arsaarneqavittutut misigisimalluni. [...] Inuit-imi sulisumut saaffiginissutigigaara ujartuullunga.

Ilanngullugu tingoqqinnissaanut periarfissamik ujartuerusuppoq.”

Nalunaarsuiffimmut allattukkani 21. december 2020-meersumi imatut

oqaasertaqarpoq:

” [A] meeqqani nukarliit pillugit saaffiginnittoq. Paaserusukkaluaraangooq meeqqaminik nukarlernik marlunnik arsaangaavissimanerluni, paasiniaanerminut pissutigaa malinnaatinneqaranilungooq susoqarniarneranillu paasitinneqarneq ajorami angajoqqaatuatut, tingoqqissanerlugillu nammineerluninalugamiuk, neriuttaraluarnearpoq meeqqani tigoqqissinnaaneranut inuttut alloriaateqassagaminammineerluni. Inuttut nakkaqqassutigisaramiginngooq meeqqani tamaasa, meeqqanili angajullit imminut attaveqarneriinuttut iluarisimaaraluarlugit nukarliit pillugit paasiniaagaluaraagami paasitinneqarneq ajorsimagamiganoq inissisimarnersut. Nassuiaanneqarnissaa pingaaruteqarpasippoq ataasialersimannginnginnami saaffiginilluni.”

Siullermeerluni saaffiginninngimmat nassuiaanneqarnissaa pingaaruteqarpasippoq.”

Nalunaarsuiffimmut allattukkani 2. februar 2021-mi kommunip A-Illu

ataatsimeeqatigiinnerat tunngavigalugu imatut oqaasertaqarpoq:

”Meeqqani nukarliit angerlarsimaffiup avataanut inissitat pillugit paasiniaalluni saaffigininnikuunera pillugu aammalu qinnuteqarnikuunera pillugu skype-kkut oqaloqatigineqarpoq.

Siullertut saaffiginissutaa siulleg oqaloqatigiissutigaarput, saaffigininnikuuvoq [...] [...] -mut meeqqani ukarliit pillugit. Paaserusuppaa meeqqaminik nukarlernik marlunnik arsaangaavissimanerluni, paasiniaanerminut pissutigaa malinnaatinneqaranilugooq susoqarneranillu paasitinneqarneq ajorami angajoqqaatuatut, tingoqqissanerlugillu nammineerluni nalugamiuk, neriuttaraluarnearpoq meeqqani tingoqqissinnaaneranut inuttut alloriaateqassagami nammineerluni. Inuttut nakkaqqassutigisaramiginngooq meeqqani tamaasa, meeqqanili angajullit

imminnut attaveqarneri inuttut iluarisimaaraluarlugit nukarliit pillugit paasiniaagaluaraagami paasitinneqarneq ajorsimagami qanoq inissisimanersut.

Ilisimatinneqarpoq ukiut tamaasa Iliuusissatut Pilersaarut nutarterneqartassasoq aammalu ataatasoq malinnaatinneqartartussaasqo angajoqqaatut oqartussaaffimmik tingumminittuummat meeqqaminut angajoqqaatuatullu.

Pisinnaatitaaffimminik aamma ilisimatinneqarsimannginnerarpoq, eqqaavaalu meeqqaminik arsaagaaginnapajussimalluni ilisimatinneqaranilu qanoq pisoqarneranik, misigisimalluni tassa annaavillugit, tingoqqissinnaanngittutut arsaagaasimaluni misigisimalluni. Ilisimatinneqarporli iliuusissatut pilersaarut taamaanngittoq, meeqqaminik arsaagaavissimaneranik allaqqasoqanngittoq, kisiannili peqqutaa angerlarsimaffiup avatanut inissinneqarnerminnut allaqqasoq. Ilanngullugu pisinnaatitaafia tikeraarsinnaatitaanermut tunngasoq ilisimatitsissutigineqarpoq, aammalu pisinnaatitaaffimmik paasitinneqarnerminik oqiliallannerarlunilu sullinneqalertutt misiginerarpoq tuppallernerarlunilu. Ukiorpasuarini saaffiginnittaraluarluni iluamilllu akineqartannginninni nakkaqqassutigerujuttarlugit eqqaavaa, aammalu saaffiginneqqinnissani nakerisimanngikkaluarpaa.

[...]

Meeqqani angerlarsimaffiup avataanut inissitaammatali amigartutut misigisimaneq misigiuarpaa, inuttut naleqanngittutut misigisimaneq, angajoqqaatut atorsinnaanngittutut. Ukiut 1-2 qaangiupput aaqqitamik meeqqani Kommune aqqutigalugu oqaloqatigiittarnertik atorunnaarsimanera ugguaraa, tamannalu pileqqikkusullugu aaqqitamik oqaluuttarnissartik.

Tapersorsorneqarnissaminik pisariaqartitsinerarpoq aammalu periarfissaasinnaasut tamaasa ammaffigilluarnerarlugit, neqeroorutaasinnaasut tamaasa ammaffigai. Tingujuartuaalernissaanut neriuppoq aammalu taamaattoqassappat/taamaattoqalerpat.

Ilanngullugu meeqqani nukarliit [B1] aamma [B2] pillugit oqaloqatigereeratsigu [B3] pillugu apeqquteqarfigaarput, sulii angajoqqaarsiamini najugaqartuummat.”

[...]

Nalunaarsuiffimmut allattukkani 26. maj 2021-mi kommune A-mik ataatsimeeqateqarsimasoq takuneqarsinnaavoq, tassani A-p meeqqami angerlartinnaasut pilersaarutiminik eqqartuilluni.

Nalunarsuiffimmut allattukkani, A-p meeqqami B1 aamma B2 angerlartinneqarnissaat pillugu 24. juni 2021-mi noqqaassuteqarsimasoq takuneqarsinnaavoq.

Nalunaarsuiffimmut allattukkani 7. maj 2021-mi kommunip A-llu ataatsimeeqatigiinnerat tunngavigalugu imatut oqaasertaqarpoq:

"Ulloq 07.05.2021 nal. 14:00 [A] oqaloqatigineqarpoq meeqqani nukarliit marluk angerlarsimaffiu avataanut inissitat pillugit.

[A] nammineerluni eqqaavaa meeqqani nukarliit marluk inissitat pillugit qanoriliuussis-sani nalusarsimallugit aammalu saaffiginnittarsimagaluarluni akineqartarsimanani.

Meeqqani angerlartikkusuppai aammalu aasamut [B1] aamma [B2] aasami atuanngiffiup nalaani [...] aasaarsioriartortikkusullugit, ilanngullugu eqqaavaa [B1] [B2]-lu qangalinngormat kingullermi [...] -miimmata.

Ilanngullugu [A] apuuppaa, [...] pāske-mi ernini [B2] tikeraaramiuk iluarusussimalutik nuannisarsimallutillu, kisiannili pakatsisimalluni. Pakatsissutini apuuppaa: Is-suaaneq aallartippoq "ernerma [B2]-p angajoqqaarsiaa [...] oqarfigimmaga naas-saangittumik [B2] paarillugu" taamannak [...] [A]-mut oqarsimasoq assut qamuuna [A] annersimanerarpoq. [A] ilisimatinneqarpoq taamaattoqanngittoq aammalu siunnersorneqarluni [A] allagaqassasoq meeqqani angerlarsikkusullugit suliaq aallartinnerussammat meeqqat angerlaqqinnissaannut. Allagaqarniarnerarpoq aammalu neruppoq marluullutik angerlassasut meeqqani aamma malugisinnaanerpai angerlarusuttut, kisiannili eqqaavaa angajoqqaarsiat suleqatigerusullugit piffissami suvisuumik angajoqqaarsiatik najornikuugamikkit.

Ilanngullugu angajoqqaatut iliuusissatut pilersarusiornissaanut ullumik aggerfissaanik tunineqarpoq, ulloq 13.05.2021 nal 13:30."

A-mut iliuusissatut pilersaarut 14. maj 2021-meersaq ilaatigut ima oqaasertaqarpoq:

"[...]

Meeqqat 2014-mi angerlarsimaffiup avataanit inissinneqarput.

[...]

meeqqami angerlartinneqarnissaanik qinnuteqarniarpoq, aammalu aasaanerani atuanngiffeqarneranni [...] -mut ilaginissaat qinnutiginiarlugu.

Meeqqat angerlartinneqarpata tapersersorneqarnissani kissaatigaa.

[...]

[A] [...] ukiumi nutaami meeqqami [B1] & [B2] angerlarsimaffiup avataanut inissineqarnikut angerlartinneqarnissaannik suliamik aallartitsiniarpoq.

[A] isumaqarpoq, meeqqami angerlarsimaffiup avataanut inissinneqarnerat siviluallaalersoq misigisimallunilu inersimavallaalertinnagit angerlartikkusullugit, nammineq ataatatut akisussaaffeqarami.

[...]"

Nalunarsuiffimmi allattukkani 20. maj 2022-meersoq ilaatigut ima

oqaasertaqarpoq:

" [...] [A] piffissamik inniminniilluni meeqqat pillugit oqaloqatiginnikkusuttoq oqaloqatingaara skybekkut. Meeqqat namminerminut angerlarnissaat qaqugu pissanersoq utaqqikatappoq.

[...]

Misigisimavoq annertunerusumik suneqassanani oqarfigineqaannarrtarluni "meeqqat tingulerpatit"

[...]

Sapaatip akunnera tulleg 25-05-22 10.00 skybe aqqutingalugu angajoqqaatut iliuusissamik pilersaarut nutartingassaq sammissallutigu isumaqatigiippugut.

Kisianni nammineq iluarnertikkaluarlugu inimi isersimaqatingalunga sanaqatinguninga iluarinerullungu.

[B2]

Aasiannut tusarniummik nassiussinissaq isumangissuara.

Suliami allagaatit akornani [B2]-mut 30. juni 2021-mi naammassisamik iliuusissatut pilersaaruteqarpoq. Iliuusissatut pilersaarummi, takuneqarsinnaavoq kingullermik 16. maj 2018-imi nutarterneqarsimasoq. Iliuusissatut pilersaarut ilaatigut ima oqaasertaqarpoq:

"[...]

Meeqqap oqaaseqaatai

[B2]-p kissaatigivaa qatanngutimi [B1] angerlareerpat takoqqaarsinnarlugu ajunngippat aattaat ataataminut angerlarniarluni

[...]

Angajoqqaat oqaaseqaataat

Angajoqqaatut meeeqqami angerlariartuaartinneqarnissaat, aammalu tamanna sillimaaffigalugu suleqataaffigerusullugu piareersimaaffigaa."

[...]

Suliami allagaatit akornanni [B2]-mut iliuusissatut pilersaarummik 5. juli 2021-mi naammassisamik peqarpoq. Iliuusissatut pilersaarut ilaatigut ima-tut oqaasertaqarpoq:

"[...]

[B1] 18-nik ukioqalertussaavoq, 18-inillu ukioqalernissaa sioqqullugu tusarniarneqarpoq meeqqat tapersersorneqarnissaannut inatsit tunngavingalugu ikiorsiis-

sutit unissanersut imaluunniit 23-nik ukioqalernissap tungaanut ingerlassanersut tusarniarneqarluni. [B1] aperivara 18-inik ukioqalereeruni maannakkutut inissisi-manini ingerlatiinnassaneraa, akissutigivaa nammineerusulluni, tassa angajoq-qaarsianiikkunnaassalluni, ataataminullu angerlarniarluni.

[...]

Suliamut allagaatinit erserpoq, A-p meeqqami B1 aamma B2 angerlartinneqarnissaat pillugu qinnuteqaataa INUIT ataatsimiititaliamit 6. oktober 2021-mi suliarineqarsimasoq. B1 aamma B2 pillugit suliap ingerlasimanerata aallaaserineqarnera ilaatigut ima oqaasertaqarpoq:

"[...]

Suliap inatsisitigullu tunngaviit nassuarneqarnerat:

B2-p angerlarsimaffiup avataanut inissitaaqqasoq angerlarnissaanut ataataasup A allangaqarluni qinnuteqaatingaa.

A nammineq ataatuut piareersimalerami meeqqami utertinneqarnissaat kissaatigivaa, aamma angerlarsimaffiup avataanut inissitaaqqanerat ingasalerma.

[...]"

INUIT ataatsimiititaliap 6. oktober 2021-mi ataatsimiinnerani suliap ingerlanneqarnerata allaaserineqarnerani aammattaaq ukua oqaatigineqarput:

[...]

Suliap inatsisitigullu tunngaviit nassuarneqarnerat:

B1-p aamma B2-p angerlarsimaffiup avataanut inissitaaqqasut, angerlarnissaanut ataataasup A allangaqarluni qinnuteqaatingaa.

A nammineq ataatuut piareersimalerami meeqqami utertinneqarnissaanut kissaatigivaa, kiisalu angerlarsimaffiup avataanut inissitaaqqanerat ingasalerma.

[...]

[A]-p meeqqami marluk angerlartinneqarnissaannut allaganngorlugu noqqaasutini juni qaammat tunniuppaa, meeqqami angerlarsimaffiup avataanut inissinneqarnerat siviisallaaleqimmat."

[...]

Nalunaarsuiffimmi allattukkani 1. juni 2022-meersoq ima oqaasertaqarpoq:

" A ornigulluni saaffiginnippoq meeqqani pillugit.

Ukiut tamaasa iliuusissatut pilersaarut meeqqaminilli arsaagaagami sananeqartarsimavoq, taannalu suliarineqaraangat oqarfigineqartarsimavoq taanna suliarineqaraangat meeqqat utertinneqarnissaat pillugu taanna suliarineqartoq, kiisalu [...]

meeqqat utertinneqarsinnaanngitsut, tamatuma kingunerisaanik [...] pisimavai meeqqani tigusukkaluarnermut. Sooruna iliuusissatut pilersaarusiortuarneq asulusaqattaartoq?

Angajoqqaatut pisinnaatitaaffeqarpoq kisiannili sullinneqarnermini sullinnerlunneqartutut misiguarpoq, kiisalu meeqqat pisinnaatitaaffeqarput taakkulu ataaminnut uterusukkaluarput maannamulli sulit utertinneqanngillat.

Qanoq pisoqassava, iliuusissatut pilersaarusioqqittoqassava?"

A-p kommunillu 28. juni 2022-mi ataatsimeeqatigiinnerat tunngavigalugu nalunaarsuiffinnut allattugaq 28. november 2022-mi suliarineqartoq ima oqaasertaqarpoq:

" Angajoqqaamut iliuusissatut pilersaarut nutartingassaq naapissutingeqqipparput. Meeqqat angerlarpata [A] kissaatingaa ilaqutariit illuaniilluunniit oqaloqateqartalerusulluni angajoqqaajunermi perorsaanermit meeqqat killiffiani aqutissiorneqarluni siunnersorneqartarusulluni.

Qulequttat pingaarnerit tikikkusutai:

-Meeraqarneq/Perorsaaneq

-Inuttut killiffik

-Angajoqqaajuneq

Nammineq misigissutsimini eqqarsartaatsikkut tarnikkullu sanngiilleqqalluni. Siunissamilu arlaanik inuttut ineriartuutaasuinnaasunik Kommune ingerlatsissappat soqutiginiiluni ammaffigivai.

Ernini [...] maanna ineqatingivaa.

Pingaartippaa artorsarfimmi nuannaarfimmilumi meeqqami unneqqariffiginissaat.

A kommunip angerlartitsinissamik noqqaassutini pillugu piffissaq suliap suliarineqarneranut atorineqartoq pillugu sulisuma ilaannut oqaasiinnakkut 24. september 2022-mi naammagittaalliuteqarpoq.

Sulisuma ilaat 1. november 2022-mi oqarasuaatikkut kommunimut attaveqarpoq. Kommunimi sullissisumit ilaatigut sulisuma ilaanut oqaatigineqarpoq, A-p meeqqami angerlartinneqarnissaat pillugu 9. juni 2021-mi noqqaasuteqarsimasoq, B2-li pillugu sulit aalajangiisoqarsimanngitsoq. Kommunimi sullissisumit aamma oqaatigineqarpoq, suliap ingerlasimanerata allaaserineqarnera suliarineqarsimasoq, taannali suliami ataqatigiissaarisumit nutarsarlugu suliarisassanngorlugu utertinneqarsimasoq. Taamaalilluni kommunimi sullissisumit oqaatigineqarpoq, suliap nutarsarnera utaqqineqarsimasoq.

Kommune allakkatigut suliamut allagaatinik oqaaseqaammillu 23. november 2022-mi noqqaavigaara, ilaatigut ima oqaasertaliillunga:

"1. Tunuliaqutaq

Sulisuma ilaat 24. september 2022-mi [...] [A]-mik oqaloqateqarpoq. Oqaloqatigiinneq tunngavigalugu [A] sulisuma ilaanut, oqaloqatigiinnermi imaqaarniliuutigisumut naammagittaalliuteqarpoq.

[A]-p naammagittaalliutaa imatut paasivara, A ukiut arlallit meeqqami 16-inik ukiullip angerlartinneqarnissaanik noqqaassuteqartarsimasoq, ernermili qaqugu angerlartinneqarnissaa Kommune Qeqertalimmit sulii aalajangiiffigineqarsi-mannginnera naammagittaalliutigaa.

Sulisuma ilaat kommunimut 1. november 2022-mi attaveqarpoq oqarfigineqarlunilu, [A] 9. juni 2021-mi ernimi angerlartinneqarnissaa pillugu kommunimut oqariartuuteqarsimasoq, [A]-lli maj 2022-mi kommunimut oqaatigisimagaa ernini angerlartikkusullugu, tassanilu aamma ernerata angerlartinneqarnissaa pillugu kommune sulii aalajangiiffinnissimanngitsoq.

2. Suliamut allagaatinik oqaaseqaammillu noqqaassut

2.1. Suliami allagaatit tamaasa Kommune Qeqertalimmut noqqaassutigaakka. Suliami allagaatinik tamanik oqarnermi pineqarput allagaatit suliap [A]-mut tunngasup suliarineqarnerani tiguneqarsimasut pilersinneqarsimasullu tamarmik, matumani allakkat tiguneqartut nassiuuneqartullu, allakkat-/allattukkat, nalunaarutiginninnerit nalinginnaasumillu allattukkat allat tamaasa ilanngullugit eqqarsaatigalugit.

2.2. Peqatigitillugu Kommune Qeqertalik qinnuigaara suliamut oqaaseqaatit aammalu [A]-p 9. juni 2021-mi meeqqami angerlartinneqarnissaat pillugu noqqaassuteqarneraniit kommunip iliuuseqarsimanerani immikkut oqaaseqaateqaqqullugu. Peqatigitillugu kommune qinnuigaara paasissutissiissutigeqqullugu, [A]-p ernermi angerlartinneqarnissaat pillugu noqqaassutaanut, kommune suna pillugu angerlartitsinissamik sulii aalajangiissuteqarsimanginnera paasissutissiissutigeqqullugu.

[...]

3. Kommunip aalajangiinera

3.1. Suliamut allagaatinik aamma suliamut oqaaseqaammik naak piniarnissannik aalajangereeraluartunga, Kommune Qeqertalik qinnuigaara [A]-p meeqqami angerlartinneqarnissaat pillugu noqqaassutaata suliarineqarnera ingerlatinnaqqullugu aammalu suliami piaartumik aalajangiissuteqaqqullugu.

3.2. Peqatigitillugu Kommune Qeqertalik qinnuigaara aalajangiinerup assilineranik uannut nassiusseqqullugu.

3.3. Tamatumunnga atatillugu suliami 2019-2 nittartakkanni takuneqarsinnaasooq kommunimut maluginiaqqara. Oqaaseqammi 2019-2-mi suliani piffissaq suliamik suliarinninnermut atorneqartoq pillugu, tassani angajoqqaatut oqartussaasuseqartup meeqqamik angerlartitsinissamik noqqaassuteqarnera isummerfigaara.

Oqaaseqaammi ilaatigut oqaatigineqarpoq, isumaga naapertorlugu, angerlartitsinissamik noqqaassutip sapaatip akunnialuit imaluunniit qaammatialuit iluini kommune noqqaassutip akuerineqarnissaanut isummerersimasariaqartoq.”

Suliamut allagaatinik oqaaseqaammillu 20. januar 2023-mi aamma 8. marts 2023-mi nukingisaaruteqarpunga.

Kommunimit e-mailikkut 21. marts 2023-mi suliamut allagaatinik, kiisalu 9. marts 2023-mi oqaaseqaammik kommunimit tigusaqarpunga.

Kommune oqaaseqaammi 9. marts 2023-meersumi ima oqaasertaliivoq:

”Pineqartoq: [A]

[A] naammagittaalliutaanut tunngatillugu akissut.

Ernermi angerlartinnissaat pillugu naammagittaalliutaanut kiisalu angajoqqaanut iliuusissatut pilersaarutit pillugit allakkatigut ilisimatitsissutit:

14.05.2021 Angajoqqaamut iliuuseqarnissamut pilersaarussiaq
09.06.2021 [A] ernini angerlartinnissaanut qiinuteqarpoq
24.06.2021 Inunnik isumaginnittoqarfimmiik angerlartinnissaanut akissut
20.07.2021 Angajoqqaarsianiit meerarsiaq pillugu nalunaarussiaq [B1]
21.07.2021 Angajoqqaarianiit meerarsiaq pillugu nalunaarussiaq [B2]
30.08.2021 Ataatsimiititaliamut INUIT saqqummiussineq [B1]
30.08.2021 Ataatsimiititaliamut INUIT saqqummiussineq [B2]
30.08.2021 Ataatsimiititaliamut INUIT saqqummiussineq [A]
31.08.2021 Ataatsimiititaliamut ingerlateqqinneqartut angerlartinnissaannut iliuusissamut pilersaarut amingaataasoq.
01.06.2021 [A]-p saaffiginnissutaa.

Meeqqami angerlartinnissanut iliuusissatut pilersaarut amingaataanera pissutingalugu angerlartikkiartuaarnissaat ingerlanneqarnikuusimanngilaq.

Kommune 13. oktober 2023-mi suliamut ilassutini suliamullu oqaaseqaammut ilassutini noqqaavigaara, ilaatigut ima oqaaseqarlunga:

” 1. Aallaqqaasiut

./.. Allakkatigut ilanngussartalikkut 23. november 2022-meersutigit, assilineqarnera ilanngullugu nassiussakkut Kommune Qeqertalik qinnuigaara suliamut allagaatit aammalu [A]-p meeqqami angerlartinneqarnissaat pillugu noqqaassutaata

suliarineqarnerani Kommune Qeqertaliup piffissaq suliamik suliarinninneranut atugaa pillugu naammagittaalliutaanut oqaaseqaammik nasseqqullunga.

Ulloq 22. marts 2023-mi Kommune Qeqertalik suliamut allagaatinik aamma suliap suliarineqarneranut nalunaarsuamik naatsumik nassiussivoq maannakkut misissulereersimasannik. Kommunimi suliamut allagaatit misissukkakka ataani imm. 2-mi eqqaaneqarput.

Tamanna tunngavigalugu isumaqarsimavunga suliamut allagaatinut ilassummik piniarnissara pisariaqartoq, tamanna ataani imm. 3-mi erseqissarneqarpoq.

Peqatigisaanik pisariaqartissimavara oqaaseqaatinut ilassummik noqqaanissara, taanna ataani imm. 4-mi ersersinneqarpoq.

2. Kommunimi nalunaarsuiffimmi allattugaatit

2.1. Kommunimi nalunaarsuiffimmi allattugaatinik nassiussineq

Kommune Qeqertalimmit suliamut allagaatit 22. marts 2023-mi uannut nassiunneqarput, ilanngullugit Winformatikkimi [A]-mut, [B2]-mut aamma [B1]-mut allagaatit.

Winformatikkimi nalunaarsuiffimmut allattukkat [B2]-mut tunngasut misissornerini, maannamut imatut paasivara, [A]-p meerai inissinneqarnikooriarlutik angerlartinneqarsimasut, kingornalu inissinneqaqqillutik. Paasinninnera unaavoq, meeqqat ukiuni kingullerni qulini angerlarsimaffiup avataanut inissinneqaqqasimasut.

Tamatuma saniatigut paasinninnera aamma unaavoq, [A]-p 2012-imiilli noqqaassutigisarsimagaa meeqqami angerlartinneqasrissaat.

Ataani [B2]-mut tunngasut nalunaarsuiffimmi allattukkat tulleriiaassavakka, tullinnguullugit nalunaarsuiffimmi allattukkat [A]-mut tunngasut.

2.2. [B2] pillugu nalunaarsuiffimmi allattukkat

2.2.1. [B2] pillugu nalunaarsuiffimmi allattukkkanit oqaatigineqarpoq, [A]

13. december 2013-imi kommunimut saaffiginnissimasoq, paaserusullugu meeqqani qaqugu angerlartinneqassanersut.

Tamatuma saniatigut nalunaarsuiffimmut allattukkkanit 20. maj 2022-meersunit erserpoq, [A]-p Kommune Qeqertalimmit oqarfigineqaannartarnini aammalu kommune suliamut aalajangiissuteqannginnera naammaginagu oqariartuuteqartoq.

2.3. [A] pillugu nalunaarsuiffimmi allattukkat

2.3.1. Winformatikkimi [A]-mut nalunaarsuutit misissornerini erserpoq, [A] ulluni 28. november 2022, 24. juni 2021, 9. juni 2021, 26. maj 2021, 10. maj 2021, 16. februar 2021, 28. november 2019, 28. februar 2017, 7. februar 2017, 17. juni 2015, 8. oktober 2013, 4. juli 2013 aamma 21. december 2012-imi meeqqqami angerlartinneqarnissaat pillugu noqqaassutimi killiffia paasiniallugu Kommune Qeqertalimmut saaffiginnittarsimasoq. Paasinninnera unaavoq, [A]-p ulluni taakkunani saaffiginnittarnermi suliap ingerlannginnera pillugu naammaginnginnerminik oqariartuuteqartarsimasoq.

2.3.2. Nalunaarsuiffimmulli allattukkanit Kommune Qeqertalik suliamut aalajangiissuteqarsimanersaq takusinnaanngilara.

3. Aalajangiiviginninnernik noqqaassut

3.1. Suliamut allattukkat tigusat misissornerini imatut paasivara, [A] ukiut qulit sinnerlugit meeqqami angerlartinneqarnissaanik noqqaassuteqartarsimasq.

Paasinninnera aammattaaq unaavoq, Kommune Qeqertalik suliaq pillugu [A]-mik ingerlaavartumik oqaloqateqartarsimasq suliamullu killiffik pillugu ilisimatinneqartarsimasq, aammalu meeqqat angerlartinneqartinnagit iliuusissatut pilersaarut malinneqartussaasoq, aammalu imminut suliareqqaarnissaa pillugu [A] kommunimit nalunaarfigineqarsimasq.

3.2. Suliamut allagaatinit tigusanit takusinnaanngilara, ilumut [A]-p meeqqami angerlartinneqarnissaat pillugu noqqaassutaanut kommune itigartitsinissamik aalajangiivissimanersaq.

Paasinninnera maannamut unaavoq, kommunip [A]-llu akornanni oqaloqatigiinneq ingerlasarsimasq, angerlartitsinissanulli itigartitsinissamik aalajangiivit-toqartarsimanngitsaq.

3.3. Tamanna tunngavigalugu Kommune Qeqertalik qinnuigaara, [A]-p meeqqami angerlartinneqarnissaanik noqqaassuteqaqqaarneraniik, angerlatitsinissamik noqqaassummut kommune itigartitsissuteqarsimappat, itigartitsinissamut aalajangiinerit uannut nassiuteqqullugit.

4. Oqaaseqaammut ilassummik noqqaassut

4.1. Kommune Qeqertaliup nalunaarusiaani 22. marts 2023-mi tigusanni oqaatigineqarpoq, B1-p aamma B2-p angerlartinneqarnissaat 2021-p aasaani suliarineqartoq, kisiannili iliuusissatut pilersaarut suliarineqarsimanngimmat meeqqat angerlartinneqarsimanngitsut.

Nalunaarusiami 14. maj 2021-miit 1. juni 2022-mut kisimi pineqarput.

Winformatikkimi [A] pillugu allattukkanit oqaatigineqarpoq, [A]-mut iliuusissatut pilersaarutit nutarternissaa pillugu 28. november 2022-mi ataatsimiissutigineqartoq.

Kommune Qeqertalik qinnuigaara, suliamut tunngatillugu 2021-p aasaani iliuuserisimasani ilassutitut oqaaseqaammi nalunaarusioqqullugu. Peqatigitillugu kommune qinnuigaara, iliuusissatut pilersaarut eqqaaneqartoq suliarineqarsimanersaq, [A]-llu meeqqami angerlartinneqarnissaanut noqqaassutaata naammassillugu suliarinissaanut suna aporfiusimanersaq paasissutissiissutigeqqullugu.

Tamatuma saniatigut Kommune Qeqertalik qinnuigaara, 2021 sioqqullugu suliaq ingerlanneqarsimanera pillugu immikkut oqaaseqarfigeqqullugu, tassa oqaatigineqartut malillugit, [A] 2012-ilimili meeqqami angerlartinneqarnissaanik noqqaassuteqartarsimammat.

4.2. Kommune angerlartitsinissap itigartitsissutigiginissaanik aalajangiis-suteqarsimanissaminik takusaqarsinnaanngippat, kommune qinnuigaara tamanna oqaaseqarfigeqqullugu. Taamaassimappallu Kommune Qeqertalik qinnuigaara, angerlartitsinissaq pillugu suliami aalajangiissuteqartoqarsimannginneranut tunngaviusoq paasissutissiissutigeqqullugu.

[...]

5. [A]-p angerlartitsinissamik noqqaassutaata suliarineqaqqinnera

Suliami oqaaseqaammut ilassummik allagaatinullu ilassutiniq piniareernikuuga-luarumaluunniit, Kommune Qeqertalik qinnuigaara [A]-p meeqqami angerlartinneqarnissaanik noqqaassutaata pillugu suliap suliarineqar-nerata ingerlatiinnarneqarnissaa, suliarlu piaartumik aalajangiiffigineqassasoq.

Kommune Qeqertalik qinnuigaara aalajangiinerup assileneqarneranik nasseq-qullunga.”

Kommunimut allakkatigut 19. december 2023, 9. februar 2024 aamma 7. marts 2024-meersutigut suliamut allagaatinut ilassutiniq oqaaseqaammullu ilassutiniq nukingisaarivunga.

Kommune e-mailikkut 8. marts 2024-meersutigut oqaaseqaammik uannut nassiussivoq. E-maililimi kommune ima oqaasertaliivoq:

”Inuit [...] -mit akissuteqaatimini ilanngunneqartumi nalunaarput, naatsor-suutigalugu aalajangiinivik sapaatip akunnerata tulliani naammassineqassasoq.”

Oqaaseqaammi 4. marts 2024-mik ulloqartumi kommune ima oqaasertaliivoq:

”[A]-p naammagittaalliutaa pillugu Kommune Qeqertalik pillugu akissuteqaat

Kommune Qeqertalimmi Isumaguinninnermi ingerlatsivik INUIT [...] allakkatigut naammagittaalliummik 13.10.2023-mi tigusaqarpoq.

Suliami allakkiat misissornerini, suliap ingerlasimanerata allaaserineqarnera pillugu noqqaassutigisassinni allanik allakkiaqartoq takusinnaavarput.

Imaappoq, Kommune Qeqertalimmi Isumaguinninnermut ingerlatsivik INUIT [...] -mit, [A]-p meeqqami angerlartinneqarnissaanik noqqaassutaata aalajangiivigineqarneranik aammalu akissuteqarfigineqarsimaneramik peqanngitsoq, tamatumani aamma aalajangiineq iliuusissatullu pilersaarut suliarineqarsimanngitsoq.

Iliuusissatut pilersaarutip suliarineqarsimannginnera pillugu paasissutissaq kingul-leq:

[...] meeqqanut inuusuttunullu sullissisup mailerutaani erserpoq, iliuusissatut pilersaarutip suliarinissaa pillugu aggersaanermut [A] takkussimanngitsoq.

Oqaatigissavarput, [A]-p meeqqat angerlartinneqarnissaanik noqqaassutaa pillugu suliaq ingerlaannassammat.

Naggataatigullu oqaatigissavarput, Kommune Qeqertalimmi Isumaguinninnermi ingerlatsivik INUIT [...] sullissit marluk tamarmik nappaassuarmik eqqugaanikuummata aammalu katsorsartinnertik peqqutigalugu sulinngiffeqarlutik.”

Sulisuma ilaat 10. april 2024-mi aamma 27. september 2024-mi A-mut kommunip aalajangiissuteqarnerata assilineranik e-mailikkut nukingisaarummik noqqaassuteqarpoq.

Kommune A pillugu allakkatigut 24. april 2024-meersutigut imatut ilisimatitsissuteqarpoq:

” Kommune Qeqertalimmi Isumaguinninnermi ingerlatsivik INUIT [...] A-p meeqqami angerlartinneqarnissaanik 2013-imi qinnuteqaataata itigartitsissutigineqarnera oqaasiinnakkut taamaallaat pisimavoq. Itigartitsinnermut tungavisoq tassaavoq, iliuusissatut pilersaarut aamma meeqqanut tapersersuisarneq pillugu Inatsisartut inatsisaat nr. 20, 26. juni 2017-imi § 14 malinneqarsimannginnerat, soorlu:

- [...], holdinut tullernut innersuunneqassaaq
- Namminerisamik ineqanngilaq.
- Perorsaanikkut pissutsit assigiinngitsut.
- Eqqarsartaatsikkut tarnikkullu pissutsit.

Kaammattuutigissavarput, iliuusissatut pilersaarummi suliniutaasut naammassineqariarpata, meeqqavit angerlartinneqarnissaanik qinnuteqaqqissinnaagavit.

Naggataatigullu Inuit Isumaguinninnermut ingerlatsivimmit oqaatigissavarput, Meeqqanut Inuusuttunullu immikkoortortami sullissit marluk ataatsikkut napparsimallutik sulinngiffeqarsimammata, taamaalillunilu suliaq uninngatiinnarneqarsimalluni.”

